

Erhvervsstyrelsen,

**Imaqarniliaq – aktianik piginneqatigiiffiit andelsskabillu pillugit inatsisip
(piginneqatigiiffiit pillugit inatsisip) Kalaallit Nunaannut atuutilersinneqarnissaa
pillugu peqqussut**

Imai

- 1. Aallaqqaasiut**
- 2. Piginneqatigiiffiit pillugit inatsit pillugu nalinginnaat**
- 3. Aktianik piginneqatigiiffiit pillugit inatsimmi aamma andelsselskabit pillugit inatsimmi siusinnerusukkut maleruagassaasimasunut naleqqiullugu piginneqatigiiffiit pillugit inatsimmi allannguutit pingaarnerit**

- 3.1. Aktianik piginneqatigiiffinnut (peqatigiilluni piginneqatigiiffiit ilanngullugit) aamma anpartsselkabinut (aallaarnisaasut piginneqatigiiffii ilanngullugi) inatsit ataatsimoorussaq
- 3.2. Oqaatsit nassuiaatillu
- 3.3. Aallarnisaasut piginneqatigiiffii
- 3.4. Pilersitsineq
- 3.5. Piginneqatigiiffiup aningaasaataanut aningaasatigut piumasaqaatit akiliinerlu
- 3.6. Aningaasaatinut piginneqataassutsit (aktiat piginneqataassutsillu)
- 3.7. Pisortat Piginnittunik Nalunaarsuiffiat
- 3.8. Aningaasannngortitsineq tuniniarneqarsinnaanerannilu killiliinerit
- 3.9. Ataatsimeersuarneq
- 3.10. Suaaassutsinut ikinnerusunik sinniisuutitaqartunut anguniakkat kisitsisinngornerat anguniakkallu
- 3.11. Aqutseriaatsit
- 3.12. Piginneqatigiiffinni pappialanik nalilinnik niuerfimmi niuerutigineqarsinnaasuni aqutsisunut ilaasortat isaatitativ malillugit aningaasarsiaqartitaanerit
- 3.13. Sulisunik sinniisuutitaqarneq
- 3.14. Aningaasaatinik amerlisitsinerit
- 3.15. Aningaasaatinit peersineq (aningaasaatinik ikilisitsineq il.il.)
- 3.16. Aningaasaatinik piginnittuussutsit nammineq pigisat
- 3.17. Atorunnaarsitsineq (akiliisinnaajunnaarneq il.il.)
- 3.18. Kattunneq arlalinnngortitsinerlu
- 3.19. Allannngortitsineq
- 3.20. Naalagaaffiup aktianik piginneqatigiiffiutaannut maleruagassat immikkut ittut

4. Peqqussutissatut missingiummut Kalaallit Nunaanni pissutsit kingunerannik allannguutissatut siunnersuutit

- 4.1. Maleruagassat, EU-mut ilaasortaanermik piumasaqaatitaqartut
- 4.2. Piginneqatigiiffimmi pissutsit pillugit paasissutissanik il.il. Erhvervsstyrelsimut nalunaaruteqarnissamut piffissaliussat
- 4.3. Piginneqatigiiffimmut pisassatut piumasaqaatit il.il. nalunaarutiginnissaannut kaammattuutit Erhvervsstyrelsimut qarasaasiaqarfiatigut tamanut saqqummiunneqartunut akiligassaqarfiit aningaasaatinillu piginnittut qisuariaateqarnissaannut piffissaliussat
- 4.4. Piginneqatigiiffimmi pissutsit pillugit nalunaarsuinerit siunissami taamaallaat Erhvervsstyrelsimut qarasaasiaqarfiatigut tamanut saqqummiunneqartassapput
- 4.5. Nammineerluni nalunaarsuineq
- 4.6. Piginneqatigiiffiit pillugit inatsimmi naalagaaffiup piginneqatigiiffiit maleruagassat Namminersorlutik Oqartussat piginneqatigiiffiit atorsinnaanerannut periarfissat

5. Peqqussutit Kalaallit Nunaannut atuutsinneqalernera ikaarsaariarnermilu aalajangersakkat il.il.

1. Aallaqqaasiut

Kalaallit Nunaannut piginneqatigiiffiit pillugit inatsisip nutarterneqarnissaa Kunngip peqqussutissaatut missingiutikkut nassiuunneqartukkat siunertaavoq, taamaasilluni aktianik piginneqatigiiffiit pillugit inatsisip Kalaallit Nunaannut atuutsinneqalernissaa pillugu Kunngip peqqussutaa nr. 620, 23. juni 2008-meersoq maannamut atuuttoq aamma andelselskabit pillugit inatsisip Kalaallit Nunaannut atuutsinneqalernissaa pillugu Kunngip peqqussutaa nr. 619 maannamut atuuttoq atorunnaarsinneqassalluni, kiisalu aktianik piginneqatigiiffiit andelselskabillu pillugit inatsisip (piginneqatigiiffiit pillugit inatsisip) Kalaallit Nunaanni pissutsit kingunerannik allannguutitalerlugu Kalaallit Nunaannut atuutsinneqalernissaa pillugu peqqussummik taarserneqarluni.

Taamaasilluni piginneqatigiiffiit pillugit inatsip nutaap allannguutissatullu inatsisit kingorna takkukkumaartussat Kunngip peqqussutaatigut Kalaallit Nunaannut tamakkiisumik ilaannakortumilluunniit atuutsinneqalernissaat peqqussutissatut missingiummi siunertaavoq. Inatsisit tulliuttut Kalaallit Nunaanni pissutsit kingunerannik allannguutitalerlugit Kalaallit Nunaannut tamakkiisumik ilaannakortumilluunniit atuutsinneqalernissaat peqqussutissatut missingiutikkut taamaasilluni siunnersuutaavoq:

- Aktianik piginneqatigiiffiit andelselskabillu pillugit inatsit (piginneqatigiiffiit pillugit inatsit) nr. 470, 12. juni 2009-meersoq
- Ukiumoortumik naatsorsuutit pillugit inatsisip aamma piginneqatigiiffiit pillugit inatsisip allangortinneqarnissaat pillugu inatsit nr. 720, 25. juni 2010-meersoq (Kukkunersuinerimut pisussaaffiup qasukkaaviginera)
- Aktianik piginneqatigiiffiit andelselskabillu pillugit inatsisip (piginneqatigiiffiit pillugit inatsit) allangortinneqarnissaa pillugu inatsit nr. 1557, 21. december 2010-meersoq

(Kattunnernut arlalinnortitsinermullu il.il. atatillugu nalunaaruteqarnissamut uppersaateqarnissamullu piumasaqaatit pillugit malitassat allannortinnerisa piviusunnortinnerat)

- Piginneqatigiiffiit pillugit inatsisip, ukiumoortumik naatsorsuutit pillugit inatsisip kiisalu pappialanik nalilinnik niuerneq il.il. pillugit inatsisip allannortinneqarnissaat pillugu inatsit nr. 477, 30. maj 2012-imeersoq (aktiat tigummiartumit pigineqartut pillugit pisortat oqartussaasuisa paasissutissanik pissarsinissamut periarfissaqarnerulernerat aamma suliffeqarfiit ilaannut naatsorsuutininik nakkutilliinermut akiliutit allannortinnerat)
- Attaveqatigiinnerup pinngitsoorani digitalimik ingerlanissaa il.il. pillugit inatsisitigut aalajangersakkat assigiinngitsut allannortinneqarnissaat pillugu inatsit nr. 1231, 18. december 2012-imeersoq (Attaveqatigiinnerup pinngitsoorani digitalimik ingerlanissaa kiisalu oqartussaaffiit nuunneqarnerisa il.il. kinguneranik naleqqussaanerit)
- Piginneqatigiiffiit pillugit inatsisip, ukiumoortumik naatsorsuutit pillugit inatsisip kiisalu inatsisit allat assigiinngitsut allannortinneqarnissaat pillugu inatsit nr. 1383, 23. december 2012-meersoq (qullersaallutik aqutsisuusuni suaassutsinut agguataarinermut kisitsisitigut anguniakkat anguniakkallu pillugit maleruagassanik eqqussineq, tamannalu pillugu nalunaaruteqarneq)
- Piginneqatigiiffiit pillugit inatsisip, suliffeqarfiit inuussutissarsiornermik ingerlatsisut ilaat pillugit inatsisip, ukiumoortumik naatsorsuutit pillugit inatsisip kiisalu Suliffeqarfinnik Qitiusumik Nalunaarsuiffik pillugu inatsisip allannortinneqarnissaat pillugu inatsit nr. 616, 12. juni 2013-imeersoq (Aallarnisaasut piginneqatigiiffiinik eqqussineq, anpartsselskabit piginneqatigiiffittut aningaasaataasa minnerpaaffissaannut piumasaqaatit, anpartsselskabinik killilimmik akisussaaffeqartunik nutaanik, suliffeqarfiit inuussutissarsiornermik ingerlatsisut il.il. pillugit inatsimmut ilaasunik pilersitsinissamut periarfissap atorunnaarsinnera.)
- Pillaasarnermik inatsisip, eqqartuussisarneq pillugu inatsisip inatsisillu allat assigiinngitsut allannortinneqarnissaat pillugu inatsit nr. 634, 12. juni 2013-imeersoq (Aningaasanik pinerluuteqartarneq akiorniarlugu suliniarnerup sakkortusinera)
- Ukiumoortumik naatsorsuutit pillugit inatsisip, piginneqatigiiffiit pillugit inatsisip inatsisillu allat assigiinngitsut allannortinneqarnissaat pillugu inatsit nr. 1367, 10. december 2013-imeersoq (Ukiumoortumik nalunaarutit tuluttoortut aamma inuiaqatigiinnut akisussaaneq pillugu nassuiaat)
- Piginneqatigiiffiit sulisut aningaasaliissuteqarfigisaat pillugit inatsit nr. 1284 af 09. december 2014-imeersoq
- Ukiumoortumik naatsorsuutit pillugit inatsisip inatsisillu allat assigiinngitsut allannortinneqarnissaat pillugu inatsit nr. 738, 1. juni 2015-imeersoq (Allaffissornikkut nammagassat ikilisarnerat, naatsorsuutininut nunat tamat akornanni periutsinut naleqqussaaneq, naatsorsuutininut malitassanik nutaanik piviusunnortitsineq kiisalu paasiuminartuunissaanut malitassanut allannuutit il.il.)
- Piginneqatigiiffiit pillugit inatsisip, suliffeqarfiit inuussutissarsiornermik ingerlataqartut ilaat pillugit inatsisip, iluanaarutininik pinerlunnikkut malunnarunnaarsitsineq peqqarniitsuliornernullu aningaasaliisarnerit akiorniarlugit iliuitsit pillugit inatsisip kiisalu akileraartarnermik nakkutillineq pillugu inatsisip allannortinneqarnissaat pillugu inatsit nr. 739, 1. juni 2015-imeersoq (Inuussutissarsiornermik suliasaqarfimmi akileraarutikinnerususarfimmut nuuttartut akiorniarneranni suliniutit ilaasa piviusunnortinnerat)

Peqqussutissatut missingiut inatsisit nalunaarutigineqarneranni ilusiliussaasartoq malillugu suliarineqarpoq. Taamaasilluni peqqussutissatut missingiut aktianik piginneqatigiiffiit

andelsselskabillu pillugit inatsit (piginneqatigiiffiit pillugit inatsit) pillugu nalunaarut nr. 610, 28. april 2015-imeersoq tunuliaqutaralugu suliarineqarpoq, taamaasilluni piginneqatigiiffiit pillugit inatsimmut allannguutissatut siunnersuutit marluk tulliullutik saqqummiunneqartut, inatsit nr. 738, 1. juni 2015-imeersoq aamma inatsit nr. 739, 1. juni 2015-imeersoq qulaani taaneqartut, peqqussutissatut missingiummut ilanngullugit suliarineqarlutik.

Piginneqatigiiffiit pillugit inatsit nutaaq, aktianik piginneqatigiiffiit andelsselskabillu pillugit inatsit nr. 490, 12. juni 2009-meersoq, (piginneqatigiiffiit pillugit inatsit), Folketingip 2009-mi akuersissutigaa, taassumalu aktianik piginneqatigiiffiit pillugit inatsit aamma andelsselskabit pillugit inatsit taamanikkumut atuuttut taarserpai.

Piginneqatigiiffiit pillugit inatsit 2009-meersoq, qulaani takuneqarsinnaasutut kingorna arlaleriarluni allanngortinneqartarpoq. Taamaalilluni 2013-imi inatsimmik nalilersuisoqarpoq, inatsisip sukumiisumik allanngortinneqarneranik kinguneqartumik. Allannguutit taakku inatsimmut allannguutikkut nr. 516, 12. juni 2013-imeersukkut piviusunngortinneqarput.

Piginneqatigiiffiit pillugit inatsit Danmarkimut killiffikkuutaakkamik atuutilersinneqarpoq. Inatsimmi nutaami maleruagassat nutaat kingunerannik Erhvervsstyrelsi qarasaasiaqarfianik annertuumik nutarterisariaqalerneq tamatumunnga pissutaavoq, ilaatigut suliaasaqarfanni arlalinni maleruagassat nutaat eqaannerummata sakkukinnerullutillu. Taamaattumik Erhvervsstyrelsi qarasaasiaqarfiani naleqqussaanerit pisariaqartitat naammassineqartarnerat ilutigalugu maleruagassat atuutilersinneqartarput. Killiffik kingulleq, Erhvervsstyrelsi piginneqatigiiffinni aktiaatillit piginneqataasullu pillugit elektorniskimik nalunaarsuiffiata ”Det Offentlige Ejerregister” atuutilersinneranut tunngasuusoq, 15. december 2014-imi aamma 15. juni 2015-imi atuutilersinneqarpoq. Tamatuma kingorna piginneqatigiiffiit pillugit inatsisip, Kalaallit Nunaanni pissutsit pisariaqartitaannik allannguutitalerlugu kunngip peqqussutaatigut Kalaallit Nunaannut atuutilersinneqarnissaanut Namminersorlutik Oqartussat akuersissuteqarnissaasa qinnutiginissaanut tunngavissaq inissittoq nalilerneqarpoq.

2. Piginneqatigiiffiit pillugit inatsit pillugu nalinginnaat

Piginneqatigeeriaatsit allat assignagit peqataasut akiliisussatut pisussaataanerisa namminneq aallaqqaatit akiliutaannut killeqarnerat, sunnuteqarsinnaanerannullu aallaqqaatit akiliutaasa aalajangiisuunerat aktianik piginneqatigiiffiit andelsselskabillu ilisarnaatigaat. Pilersitsinermulli atatillugu aningaasaatinut aallaqqaatit akiliutit minnerpaaffeqarnissaat piginneqatigiiffinnut taakkununnga akerlianik piumasaqaataavoq, tamannalu piginneqatigiiffiit taamatut ittut ”aningaasaatinik piginneqatigiiffinnik” taaneqartarnerannut tunuliaquaavoq. Aningaasaatinik piginneqatigiiffinnut maleruagassat isumaqatigiissutit pillugit inatsiseqarnermit aallaaveqarput, piginneqatigiiffiullu malittarisassai qitiusumik uppernarsaatit allakkiapput, piginneqatigiiffimmi peqataasut pisinnaatitaaffii pisussaaffiillu tassani aalajangersagaasarlutik.

Aningaasaatinik piginneqatigiiffik aktianik piginneqatigiiffiuguni imaluunniit andelsselskabiuguni namminerisaminik pisinnaatitaaffeqarsinnaavoq pisussaaffeqarlunilu. Piginneqatigiiffimmut peqataasut aningaasaatinik piginneqatigiiffimmik atuisinnaanerit mianerisassanit arlalinnit killiligaavoq. Soorlu piginneqatigiiffiup akiligassaqarfii mianeriniarlugit aktianik piginnittut piginneqataasullu aningaasanik piginneqatigiiffimmit

annissinnaangillat, aktianik piginneqatigiiffinni andelsselsbinilu aalajangersimasuni sulisut siulersuisuni sinniisuutitaqarnissamut pisinnaatitaaffeqarput kiisalu piginneqatigiiffiup akiligassaqarfii aningaasaliisuilu piginneqatigiiffiup inissisimaneramik naliliinissamut periarfissaqartinniarlugit, piginneqatigiiffiup ukiumoortumik nalunaarusiaa tamanut saqqummiunneqartarpoq. Mianerisassanik assigiinngitsorpassuarnik isumagisaqarneq aktianik piginneqatigiiffinnut maleruagassani sakkortuneruvoq andelsselskabinut maleruagassanut naleqqiullugu, aammalu aktianik piginneqatigiiffinnut naalagaaffiup pigisaanut kiisalu piginneqatigiiffinnut niuerfimmi akuerisami niuerutaasinnaasunik pappialanik naliliutilinnut sulii sakkortunerulluni.

EU-p peqqussutaanni piginneqatigiiffiit pillugit inatsisitigut maleruagassat arlaqartut inatsimmut ilaapput. Aktianik piginneqatigiiffiit pillugit piginneqatigiiffinnut maleruagassani EU-p piginneqatigiiffiit pillugit peqqussutai annertuumik tunngavigineqarput, akerlianilli andelsselskabit pillugit maleruagassanut EU-p peqqussutai taama annertutigisumik tunngavigineqanngitsut.

Piginneqatigiiffiit pillugit inatsisikkut nutaakkut, malitsigisaanik allannguutitaqartukkut piginneqatigiiffinnik aallartitsinissaq ingerlatsinissarlu pingaarnertigut ajornanninnerulerpoq, piginneqatigiiffimmik piginnittut aqutsisullu akisussaaffeqarlutik eqaannerusumik suleriarsinnaalerput, piginnittuussutsimullu tunngasutigut annerusumik ammasuunissaq qulakkeerneqarluni. Kalaallit Nunaanni piginneqatigiiffinnut inatsisitigut maannamut atuussimasunut naleqqiullugu allannguutit pingaarnertit immikkoortoq 2-mi eqqartorneqarput. Allaaserinninnerup ataaniitup saniatigut piginneqatigiiffiit pillugit inatsimmut malitsigisaanilla allannguutit inatsisinut qulaani taaneqartunut oqaaseqaatit innersuussutigineqarput.

Allaaserinninnerup saniatigut inatsisinut oqaaseqaatit ataaniitut innersuussutigineqarput. Ilanngullugu oqaatigineqarsinnaavoq maleruagassat suleriaatsimi qanoq atorineqarsinnaanerat pillugu Erhvervsstyrelsi ilitsersuutiniq arlalinnik piginneqatigiiffiit taakkualu siunnersortaasa atugassaannik suliaqarsimammat, assersuutigalugu pilersitsinermut, aningaasaatit qaffannerannut, aningaasaatit ikilinnerannut, kattunermut avissaartitsinermullu kiisalu atorunnaarsitsinermut atatillugu. Erhvervsstyrelsi qarasaasiakkut nittartagaani takuneqarsinnaapput, una aqutagalugu: <https://erhvervsstyrelsen.dk/vejledning-1>.

3. Aktianik piginneqatigiiffiit pillugit inatsimmi aamma andelsselskabit pillugit inatsimmi siusinnerusukkut maleruagassaasimasunut naleqqiullugu allannguutit pingaarnertit

Aktianik piginneqatigiiffiit pillugit inatsimmi aamma andelsselskabit pillugit inatsimmi siusinnerusukkut maleruagassaasimasunut naleqqiullugu allannguutit pingaarnertit piginneqatigiiffiit pillugit inatsimmut ilanngunneqartut immikkoortoq 3-mi immikkoortuaqqani eqqartorneqarput. Allannguutit Kalaallit Nunaannut attuumassuteqanngitsutut nalilinnerqartut immikkoortoq 3-mi immikkoortuaqqani ilaatinneqanngillat. Tamatumani allannguutit EU-mut ilaasortaanissamik piumasaqaatitallit pineqarput, soorlu killeqarfiit akimorlugit kattunermi nunat akimorlugit maleruagassani allannguutit il.il.

Piginneqatigiiffit pillugit inatsimmi maleruagassanut danskit piginneqatigiiffiinut atuuttunut naleqqiullugu Kalaallit Nunaanni pissutsit kingunerisaannik allannguutissanik arlalinnik siunnersuuteqarpoq. Allannguutissat siunnersuutit immikkoortoq 4-mi naalisakkami erseqqinnerusumik eqqartorneqarput.

3.1. Aktianik piginneqatigiiffinnut, peqatigiilluni piginneqatigiiffinnut kiisalu andelsselskabinut (aallarnisaasut piginneqatigiiffii ilanngullugit) ataatsimoorussamik inatsit

Piginneqatigiiffit pillugit inatsit aktianik piginneqatigiiffinnut, ilanngullugit peqatigiilluni piginneqatigiiffinnut (aktiaateqarluni ingerlatseqatigiiffinnut assigiinngitsunik pisussaatisisunut), kiisalu andelsselskabinut, ilanngullugit aallarnisaasut piginneqatigiiffiinut ataatsimoorussamik inatsisaavoq.

Aallarnisaasut piginneqatigiiffii immikkorluinnaq ittumik andelsselskabiupput, piginneqatigiiffit pillugit inatsimmut 2013-imi ilanngunneqarut. Aallarnisaasut piginneqatigiiffii immikkoortoq 3.3.-mi erseqqinnerusumik eqqartorneqarput.

Piginneqatigiiffit pillugit inatsisip aktianik piginneqatigiiffit pillugit inatsit aamma andelsselskabit pillugit inatsit taarserpai.

Piginneqatigiiffit pillugit inatsit nassuiaatit pillugit aalajangersakkanik aamma nalunaaruteqarneq nalunaarsuinerlu pillugit aalajangersakkanik aallartinneqarpoq. Tamatuma kingorna kapitalit qulequttat malillugit agguataagaasut tulliutinneqarput, kapitalini tamani suut aktianik piginneqatigiiffinnut atuunnersut suullu andelsselskabinut atuunnersut sammineqartarluni. Naggataagullu taarsiisuteqarnissamut pillaatisinissamullu aalajangersakkat kiisalu naammagittaalliuuteqarnissamut aqqutissat atuutilersitsinissarlu pillugit aalajangersakkat ilanngunneqarput.

3.2. Taaguutit nassuiaatillu

Piginneqatigeeriaatsinut inatsimmut ilaatinneqartunut ”aningaasaatinik piginneqatigiiffinnik” oqariartaaseq ataatsimoorussamik taaguutit atorneqarpoq.

Aktianut piginneqataassutsinullu oqariartaaseq ”aningaasaatinut piginneqataassuseq” ataatsimoorussamik taaguutit atorneqarpoq.

Aktianik piginnittunut piginneqataasunullu oqariartaaseq ”aningasaatinik piginnittut” ataatsimoorussamik taaguutit atorneqarpoq.

Aktiaticut aningaasaatinut aamma piginneqataassutsimut aningaasaatinut oqariartaaseq ”piginneqatigiiffiup aningaasaatai” ataatsimoorussamik taaguutit atorneqarpoq.

Suliffeqarfissuit pillugit nassuiaat allanngortinneqarpoq, taamaasilluni nassuiaat naatsorsuuserinermi nunat tamat akornanni ileqqusumik malitassiarineqartut, International Financial Reporting Standards (IFRS) assigisaat atorneqalerlutik.

Piginneqatigiiffiit pillugit inatsimmi aqutsinermut oqariartaatsit nutaat arlallit atorneqarput, ilanggullugit qitiusumik aqutsisuutitat amma qullerpaatut aqutsisuutitat kiisalu nakkutilliisut atorneqarlutik. Oqariartaatsit taakku 3.11-imi aqutsinermut ilusiliussanut tunngasumi erseqqinnersumik eqqartorneqarput.

3.3. Aallarnisaasut piginneqatigiiffii

Aallarnisaasut piginneqatigiiffiat immikkut ittumik ilusiligaalluni andelselskabiuvog, taamaattumillu allanik erseqqilluinnartumik aalajangersaasoqarsimangippat. inatsisip andelselskabit pillugit maleruagassartaannut ilaalluni. Tamaasilluni aallarnisaasut piginneqatigiiffiat piginneqatigiiffiit pillugit inatsimmut naleqqiullugu piginneqatigiiffiuvoq killilimmik akiliisussaataasoq. Tamanna isumaqarpoq piginnittoq/piginnittut piginneqatigiiffiup qaqugukkulluunniit aningaasaataasa nalinginut taamaallaat akiliisussaataasoq/-sut.

Aallarnisaasut piginneqatigiiffiit immikkut ittoq tassaavoq piginneqatigiiffiup aningaasaqarneranut tunngasut pillugit maleruagassat immikkut ittut atuummata. Piginneqatigiiffik 1 kr.-mik aningaasaateqartillugu aallarnisaasut piginneqatigiiffiat pilersinneqarsinnaavoq, taamaasilluni piginneqatigiiffimmi ikinnerpaamik ataatsimik aningaasaatinik piginnittuussuseqartoqassalluni. Piginneqatigiiffiup aningaasatigut tunngaviata annertusarnissaanut pinngitsoorani sillimmatissanut piginneqatigiiffiup sinneqartoortuataa minnerpaamik 25 procentinik illikartitsinissaq aallarnisaasut piginneqatigiiffiata pisussaaffigaa. Tamatuma saniatigut piginneqatigiiffiup piginneqatigiiffittut aningaasaatai kiisalu piginneqatigiiffiup aningaasatigut tunngaviata annertusarnissaanut pissamaatit annertusarnerannut aningaasaatit minnerpaamik 50.000 kr.-nik annertussuseqalersinnagit, aallarnisaasut piginneqatigiiffiat sinneqartoortutinnik agguaaassisinnaangilaq.

Taamaalilluni aallarnisaasut piginneqatigeeriaasiannik atuinikkut, piginneqatigiiffiup aningaasaataasa 50.000 kr.-nik minnerpaaffeqarnissaannik piumasaqaatip angunissaanut aningaasaatinik piginnittut ”sipaarniarnissamut” periarfissaqartinneqarput.

Aallarnisaasut piginneqatigiiffiisigut soorlu taaguutaata ersersikkaa. aallaarnisaanermik suliallit, niuerutaasinnaasunik aallartitsinissamut periarfissallit, kisiannili aallarnisarnerminni aningaasatigut annerusumik tunngavissaqanngitsut salliutillugit sullinniagaapput. Taamatut iliornikkut sullinniakkat pineqartut aningaasatigut killilimmik akiligassaqalerlutik piginneqatigiiffinnut inatsisaasut iluini suliffeqarfimmik aallartitsinissamut periarfissaqalerput. Piginneqatigiiffiillu pillugit inatsisip kinguneranik aqutsinermut piumasaqaateqartoqarpoq, aningaasatigut illersorneqarsinnaasumik upalungaarsimanissaq ammasuunissarlu ilanggullugit piumasaqaataallutik. Naggataagullu piginneqatigiiffiit pillugit inatsimmi pigisat pillugit maleruagassat tamaginnut arlalinnik iluaqutissartaqartitsippat, ilaatigut assersuutigalugu ukiumoortumik naatsorsuusiorneq pillugu inatsimmi maleruagassat malillugit ukiumoortumik nalunaarusianik suliaqartarneq tamanullu saqqummiussisarneq annertuumik erseqqissuutitsigamik.

Suliffeqarfik ineriartortinneqarsinnaasoq paasinarsippat, piginneqatigiiffik piginneqatigiiffiit pillugit inatsimmut sinaakkusiussat ilisimaneqarluartut iluini ineriartorsinnaavoq,

taamaasillunilu nalunaarsugaanini anpartsselskabivinnngorlugu allannngortillugu, imaluunniit ungasinnerusumut isigaluni aktianik piginneqatigiiffinngorsinnaalluni. Akerlianilli andelsselskabi nalunaarsorneqarnerminik aallarnisaasut piginneqatigiiffiannut allannngortitsisinnaangilaq.

3.4. Pilersitsineq

Pilersitsinerit tamarmik maanna suleriaatsimi ataasiinnaasumi ingerlasinnaanerit nutaartaavoq, aamma aktianik piginneqatigiiffinnik pilersitsinerimi, aktianimmi piginneqatigiiffiup pilersinnerani pilersitsilluni ataatsimeersuartoqarnissaa piunasaqaataajunnaarmat. Tamatuma saniatigut aktianik piginneqatigiiffinni andelsselskabinilu piginneqataassutisunik pilersitsineq pisariillisarneqarpoq. Taamaasilluni aktianik piginneqatigiiffinni piginneqataasut allattorsimaffiannik suliarinninnissap piunasaqaataanera ingerlateqqinneqanngilaq.

Pilersitsinermit atatillugu andelsselskabimi piginneqataassutisit tamarmik pilersitsisunit pigineqarnissaat aamma piunasaqaataajunnaarpoq.

Kingornagut pilersitsinermit (tassalu piginneqatigiiffiup pilersinneqarneraniit piffissami ukiut marluk tikillugit sivilissusilimmi annertuunik pisinermit) maleruagassat aktianik piginneqatigiiffinnut taamaallaat atuuttussanngorlugit killilerneqarput – aamma pilersitsisuinnarnut.

Aningaasaatinik piginneqatigiiffiup piffissami aggersumi atuutilersussanngorlugu pilersinneqarsinnaalernera nutaartaavoq, taamaanneratigut assersuutigalugu pilersitsinerup ukiut nikinneranni aggersumi atuutilersinnissaa piffissaqarluarluni pilersaarusionsarneqarsinnaalerluni. Ullorli pilersitsinerup atuutilerfissaa sioqqullugu piginneqatigiiffik pisussaaffilersinnaangilaq.

Tamatuma saniatigut piginneqatigiiffik naatsorsuuserinikkut piffissamut kingumoortumik sunniuteqartumik pilersinneqarsinnaavoq, suliffeqarfimmut pioreersumut aningaasaliissuteqarnikkut pilersitsisoqarluni, suliffeqarfimmi allami aningaasatigut piginneqataassutisunik aalajangiisumik inissisimasunik aningaasaliissuteqarnikkut pilersitsisoqarluni.

Suliffeqarfimmut pioreersumut aningaasaliissuteqarnikkut aningaasaatinik piginneqatigiiffik pilersinneqarpat, naliliinermi nalunaarusiaq ammaanermi oqimaaqatigiissitsinermik imaqaassaaq. Aningaasaatinilli piginneqatigiissutisunik aalajangiisumik inissisimasunik aningaasaliissuteqarnikkut aningaasaatinik piginneqatigiiffik pilersinneqarpat, naliliinermi nalunaarusiap ammaanermi oqimaaqatigiissitsinermik imaqaarnissaa piunasaqaatigineqanngilaq.

3.5. Aningaasaatinut piumasaqaatit piginneqatigiiffiullu aningaasaataanik akiliineq

Andelsselskabinut aningaasaatinut piumasaqaatit 125.000 kr.-niit 50.000 kr.-nut appartinneqarput. Aktianik piginneqatigiiffinnut aningaasaatinut piumasaqaatit maannamutut 500.000 kr.-upput. Aallarnisaasut piginneqatigiiffiinut aningaasaatinut pissutsit immikkut ittut immikkoortoq 3.3.-mi eqqartorneqarput.

Aningaasaatinik piginneqatigiiffiup maanna siunissamilu pisussaaffimminik eqqortitsinissamut aningaasatigut upalungaarsimanera illersorneqarsinnaanersoq nalilersussallugu aqutsisut suli pisussaaffiguarpaat. Piginneqatigiiffiup aningaasaataasa annertussusaannik naliliineq naliliinermut tamatumunnga ilaassaaq.

Piginneqatigiiffiup aningaasaataanik akiliinerup kinguartinneqarsinnaanera nutaartaavoq, taamaattoq piginneqatigiiffiup aningaasaataasa minnerpaamik 25 procentii akilerneqassapput, minnerpaamilli 50.000 kr.-it, taamaattoqarpallu pappialat nalillit nalingisa qaffasinnerussutaannik ilallugit akilerneqassallutik. Pappialat nalillit nalingat qaffasinnerussuteqarpat, taassuma taamaallaat 25 procentiisa piginneqatigiiffinnit akilerneqarnissaat inatsisikkut piumasaqaataavoq.

Piginneqatigiiffiup aningaasaataanik akiliinissap kinguartinnissaanut periarfissaq – imaluunniit allatut oqaatigalugu, piginneqatigiiffiup aningaasaataasa ilaannik akiliinissamut periarfissaq – akiliilluni pilersitsinermut aamma aningaasaatit akiliillini qaffatsinnerannut atuuppoq. Piginneqatigiiffiup aningaasaatai naliliutit atorlugit akilerneqarpata, (apportindskud), aningaasaatit tamarmik akilerneqassapput.

Aammattaq akiitsut allagartaat taarsertinneqarsinnaasut paarlaassutigineranni, aningaasaatit amerlisinneranni kiisalu piginneqatigiiffiup pinngitsaaliissummik atorunnaarsinneqarnerata kingorna pilerseqqinnerani piginneqatigiiffiup aningaasaataanik ilaannakortumik akiliisoqarsinnaavoq.

3.6. Aningaasaatinut piginneqataassutsit (aktiat piginneqataassutsitllu)

Oqariartaaseq ”aningaasaatinut piginneqataassutsit” aktianut piginneqataassutsinullu ataatsimoortumik taaguutitut atorneqarpoq.

Aningaasaatinut piginneqataassutsit atillit aktianut piginneqataassutsinullu piginnittup aqqanut allattugaasunut ataatsimoortumik taaguutaapput. Piginneqataassutsit piginnittup aqqanut allattugaajuartussaasimapput.

Aktiat piginnittup aqqanut allattugaanngitsut tigungmiartup akiaataatut taaneqartarput. Aktianut taakkununga piginnittup aktianik tigungmiarneratigut pineqartup aktianik piginnittuunera uppersarsarneqartarpoq. Aktianik piginneqatigiiffiit tigungmiartup aktiaataanik atuisinnaajunnaarnerat nutaajuvoq. Inerteqqut 1. juli 2015-imi Danmarkimi atuutilerpoq, tamatumalu kinguneranik aktiat tamarmik ullup taassuma kingorna suliarineqartut, piginnittup aqqanik atilerlugit suliarineqartussaalerlutik. Tigungmiartup aktiaataasigut aktiaatillip kinaanermunik soorlu piginneqatigiiffimmut pisortallu oqartussaasuinut isertuussisinnaanera, tigungmiartup aktiaataasa inerteqqutaalernerannut

tunuliaqutaavoq, taamatummi iliorneq piginnittuussutsip ersarikkunnaarsinneranut, tamannalu aqquqigalugu akileraarutinik akiliinngitsoornissamut atonerlunneqarsinnaagami.

Aningaasaatinik piginnittut, aningaasaatinut piginneqatigiissutinik atermut allagaasunik peqartut, piginnittuunertik piginneqatigiiffimmut nalunaarutigissavaat, piginneqatigiiffiullu aningaasanik piginnittuussutsinik atermut allagaasunik piginnittut pillugit paasissutissat tamaasa piginnittut allattorsimaffiannut nalunaarsussavai, allattorsimaffiup aktiatillit allattorsimaffii piginneqataasunillu allattuiffiit maannamut atuuttut taarserpai. Aningaasaatit allattugaasut amerlassusaat apeqqutaatinnagu tamanna atuuppoq. Aammattaaq piginnittut Erhvervsstyrelsen piginnittunik qarasaasiakkut nalunaarsuiffianut, Pisortat Piginnittunik Nalunaarsuiffianut, immikkoortoq 3.7.-imi eqqartorneqartumut nalunaarsugaanissaat nutajuvoq.

Tigummiartup aktiaataanik piginnittut piginnittuunertik pillugu piginneqatigiiffimmut nalunaaruteqarnissamut pisussaaffeqanngillat, Pisortalli Piginnittunik Nalunaarsuiffiannut nalunaarsortinnissamut pisussaaffeqarnerat nutajuvoq, ateq, najugaq il.il. pillugit paasissutissat oqaatigisussaallugit. Piginneqatigiiffiup aningaasaataasa 5 procentiinik sinnerlugilluunniit pineqartoq pigisaqarpat, piginnittunik nalunaarsuiffimmi pineqartoq pillugu paasissutissat tamanit takuneqarsinnaassapput. Piginneqatigiiffiulli aningaasaataasa 5 procentii inorlugit pineqartoq pigisaqarpat, piginnittunik nalunaarsuiffimmi paasissutissat taamaalaat pisortat oqartussaasuinit takuneqarsinnaassapput.

Piginneqatigiiffik nammineq piginnittut allattorsimaffiannik suliaqarani, paasissutissat taarsiullugu Pisortat Piginnittunik Nalunaarsuiffiannut toqqaannartumik nalunaarutigisarsinnaavai. Pineqartumi tamatumani maleruagassat aktianik piginneqatigiiffinnut aamma andelselskabinut assigiissut eqqunneqarput.

Aktianik amerlassusilikkanik piginneqataassutsinillu amerlassusilikkanik atuisinnaalernerq nutajuvoq. Aktianik piginneqataasup piginneqataasulluunniit piginneqatigiiffiup aningaasaataasa ilaanik qanoq annertutigisunik »piginnittuunera« aktiat amerlassusilikkat piginneqataassutsilluunniit amerlassusilikkat takutippaat. Tamanna qangatoortumik taaginnarlugu naligititamit, pappialat nalillit maanna nalingannik (kursit malillugit nalingannik) nalinginnaasumik takutitsisanngitsumit pissusissamisoornerusumik takutitsisutut paasineqarsinnaavoq. Tamatuma kingorna piginneqatigiiffimmut aningaasanik piginneqatigiissutit taaginnarlugu naligititaq malillugu imaluunniit aningaasaatinut piginneqatigiissutit amerlassusilikkat atorlugit tunniunneqassanersut aningaasaatinik piginneqatigiiffiit toqqarsinnaalerpaat.

Aktiat taasissutaasinnaanngitsut inerteqqutaanerat atuuttoq aamma aktiat atorlugit taasisinnaanermut pisinnaataaffiup qanoq annertutigisinnaanerannik killiliineq atuuttoq piginneqatigiiffiit pillugit inatsisikkut atorunnaarsinneqarput.

Aktianik piginnittuunermik uppersaatinik tunniussisussaaneermut piumasaqaat piginneqatigiiffiit pillugit inatsisikkut atorunnaarsinneqarpoq. Aktianik piginnittuunermut uppersaatinik tunniussisoqarnissaa ataatsimeersuarnermi nalinginnaasumik

amerlanerussuteqartut aalajangersinnaavaat. Piginneqatigiiffiit pillugit inatsit malillugu piginneqatigiissutinik piginnittuunermut uppersaatinik tunniussinissaq andelsselskabit assigisaanik aalajangersinnaavaat. Piginneqatigiissutsit tamanut tuniniarneqarsinnaannginnerannik tunngaveqarneq sulii atuuttuassaaq.

Pisisinnaatitaanermut salliutitaanermut atugassarititaasut naleqqutinngitsut eqqartuussivinnit nakkutigineqarsinnaanerannut maleruagassat atuuttut aamma andelsselskabinut atuuttunngorlugit annertusineqarput, kiisalu misissuiartortitanik naliliisartunillu atuinnissamut maleruagassat pillugit suleriaaseq pitsaanerulersinneqarluni.

3.7. Pisortat Piginnittunik Nalunaarsuiffiat

Aningaasaatinik piginneqatigiiffinni aningaasaatinik piginnittut pillugit paasissutissat nalunaarsorneqarnissaannut piginnittunik qarasaasiakkut nalunaarsuiffik, Pisortat Piginnittunik Nalunaarsuiffiat Erhvervsstyrelsimi nutaatut pilersinneqarpoq. Nalunaarsuiffik ammasumik tamanit alakkarneqarsinnaasumik immikkoortoqarpoq, matoqqasumillu taamaallaat pisortanit alakkarneqarsinnaasumik immikkoortoqarluni.

Piginnittoq pillugu paasissutissat tamaasa piginnittunik nalunaarsuiffiup immikkoortuani ammasumi aamma immikkoortuani matoqqasumi nalunaarsorneqarnissaat piginneqatigiiffiup pisussaaffigimmagu, piginnittunik allatuiffiup piginnittunik nalunaarsuiffik aqutigalugu ingerlannissaa piginneqatigiiffimmut immikkoortoq 3.6.-imi taaneqartutut iluaqutaasinnaavoq. Piginnittut pillugit paasissutissanik oqarnermi, paasissutissat piginnittup kinaassusersineqarnissaanut periarfissiisut pineqarput, aqqit najugarlu ilanngullugit.

Taamaasilluni aningaasaatinik piginnittut, piginneqatigiiffimmi aningaasanik piginneqatigiissutit *5 procentiinik sinnerlugilluunniit* piginnittut pillugit paasissutissat, piginneqatigiiffiup aningaasaataasa qanoq annertutiginerat apeqqutaatinnagu Pisortat Piginnittunik Nalunaarsuiffianni qarasaasiakkut toqqaannartumik alakkarneqarsinnaassapput. Tamatumani aningaasanik piginneqatigiissutit atermut allatat – tassalu aktiat piginneqatigiissutillu atermut allatat – kiisalu aktiat tigummiartumit pigineqartut, aktianik tigummiartumit pigineqartut suliarinissaasa immikkoortoq 3.6.-imi taaneqartutut inerteqqutaalernerat sioqqullugu suliarineqarsimasut pineqarput. Taamaasilluni paasissutissat taakku pisortanit inuinnarnillu misissorneqarsinnaapput. Tamanna aktianik piginneqatigiiffinnut andelsselskabinullu atuuppoq.

Aningaasaatinik piginnittut, piginneqatigiiffimmi aningaasanik piginneqatigiissutit *5 procentii inorlugit* piginnittut, piginnittunik nalunaarsuiffiup immikkoortuani matoqqasumi nalunaarsorneqassapput. Tamatumani aningaasaatinik piginneqatigiissutit atermut allagaasut kisimik pineqanngillat, kisiannili aktiat tigummiartumit pigineqartut, aktiat tigummiartumit pigineqartut immikkoortoq 3.6.-imi taaneqartutut suliarineqarnissaasa inerteqqutaalernerat sioqqullugu suliarineqarsimasut aamma pineqarput. Paasissutissat tamakku taamaallaat pisortat oqartussaasuinit takuneqarsinnaapput.

3.8. Aningaasanngortinneri tuniniarnissaannullu killiliinerit

Naak piginneqatigiissutit tamanut tuniniarneqarsinnaanngikkaluartut, pinngitsaaliisummik aningaasannngortitsineq aningaasannngortitsinermullu pisinnaatitaaffik eqqarsaatigalugit, piginneqatigiiffiit pillugit inatsimmi piginneqataasut aktiaatilittulli pisinnaatitaaffeqarlutillu pisussaaffeqarnissaat tulluurtutut isigineqarpoq. Taamatut iliornikkut piginneqatigiissutinik aningaasannngortitsinermut apeqqut malittarisassani eqqaaneqarsimatinnagu, amerlanerussutilinnik piginneqataasumut suut atuuttusaa nerat qularutigineqassanngilaq.

Pinngitsaaliisummik aningaasannngortitsinissaq taamaallaat amerlanerussutilinnik aktiaatilimmit / amerlanerussutilinnik piginneqataasumit aalajangerneqassaaq. Taamaasilluni piginneqatigiiffiup aqutsisui peqatigalugit ataatsimoorussamik aalajangiisoqartarnissaa piumasaqaataajunnaarpoq. Aningaasaatinik piginnittoq piginneqatigiissutit taasisinnaanerullu 9/10-iannik piginnikkuni, tamanna tunngavigalugu aalajangiisumik sunniuteqareernerata, aqutsisullu inuttalersugaanerannik allannguereersinnaanerata nassuerutiginerat allannguineranut tunngavigineqarpoq.

Akiligassanik taarsersuineranut maleruagassat pisariillisarneqarput, aningaasaatinillu annikillitsinernut allanut maleruagassanut tulluarsarneqarlutik. Pisariillisaaneranut tamatumunnga atatillugu akiligassanik taarsersuineranut atatillugu siunissami akiligassaqaarfiganut nalunaaruteqartoqartassaaq, taamaattumik nalilersuineq pillugu aktianik piginneqatigiiffiit pillugit inatsimmi immikkut ittumik maleruagassaaq piginneqatigiiffiit pillugit inatsimmi ingerlateqqinneqanngilaq.

3.9. Ataatsimeersuarneq

Aktianik piginneqatigiiffiit amerlanersaat ataasiinnarmik ikittuaqqanilluunniit piginnittoqarmata, ataatsimeersuarnivimmi aalajangiisoqarnani, piginneqatigiiffinni pisarnertut nalinginnaasumik allami aalajangiisoqartarnissaa aktianik piginneqatigiiffimmi aktiaatillit piginneqatigiiffiit pillugit inatsit malillugu aalajangersinnaavaat. Aningaasaatinilli piginnittup, piginnittulluunniit arlallit piginneqatigiiffiup aningaasaataasa 10 procentiinik piginnikkunik, ataatsimeersuarnerup najuuffigalugu ingerlanneqarnissaa piumasarisinnaavaat.

Piginneqatigiiffinni aningaasanik niuerfinni niuerutaasinnaasuni aktianik piginnittut pisinnaatitaaffiisa aalajangersimasut isumaginissaat pillugu Europa-Parlamentip aamma Europa Rådip peqqussutaat nr. 2007/36/EF, 11. juli 2007-imeersoq piginneqatigiiffiit pillugit inatsisikkut atuuttussannngortinneqarpoq. Aktianik piginneqatigiiffinni, niuerfimmi maleruagassaqaartumi niuerutaasinnaasunik aktiaateqartuni (tulliuttuni taagorneqartut ”piginneqatigiiffiit aningaasanik niuerfinni niuerutaasinnaasut”) ataatsimeersuarnermut aggeqqusineq pillugu aalajangersakkani peqqussut allannguutinik arlalinnik kinguneqarpoq.

Piginneqatigiiffimmi aningaasanik niuerfinni niuerutaasinnaasumi ataatsimeersuarnermut aggeqqusissut peqqussut aamma piginneqatigiiffiit pillugit inatsit malillugit ulloq ataatsimeersuarfissaq kingusinnerpaamik ullunik 21-nik sioqqutsisumik nassiunneqassaaq. Pisulli ilaanni, soorlu immikkut ittumik ataatsimeersuarnernut aggeqqusissut, ataatsimeersuarnissamut ullut 21-nngornerannit kingusinnerusumi nassiunneqarsinnaavoq. Tamatuma saniatigut peqqussummi piumasaqaatigineqartutut, aggeqqusissutip imarisaanut

piginneqatigiiffiit pillugit inatsimmi piumasaqaatinik annertusisiskanik aalajangersagaqarpoq, piginneqatigiiffiillu aningaasanik niuerfinni niuerutaasinnaasut qarasaasiakkut nittartagaanni paasissutissanik arlaqartunik uppersaaitillu allakkianik tamanut saqqummiussisoqarnissaa piumasaqaatigineqarluni.

Piginneqatigiiffinnut aningaasanik niuerfinni niuerutaasinnaasutut allattorsimanngitsunut aggeqqusinnissamut piffissaliussaq ullunit 8-niit sapaatit akunnerinut marlunnut sivitsorneqarpoq, aggeqqusissutip imarisaanut piumasaqaatit maannamut atuuttut il.il. ingerlatseqatigiiffiit pillugit inatsimmi ingerlateqqinneqarlutik.

Oqaluuserisassatut siunnersuutit oqaluuserisassanut ilanngukkusunneqartut tunniunneqarnissaannut sapaatit akunnerisa arfinillit piffissaliussaananeraktianik piginneqatigiiffinnut aggeqqusissummi erseqqissumik taaneqassaaq. Siunnersuutit piffissaliussap tamatumaa qaangiutereernerani tunniunneqartut, aatsaat qitiusumik aqutsisunit angumerineqarsinnaagunik oqaluuserisassanut ilanngunneqarsinnaapput.

Piginneqatigiiffiit aningaasanik niuerfinni niuerutigineqarsinnaasut piginneqatigiiffiup qaqugukkut ataatsimeersuarnissaata naatsorsuutigineqartup qaqugukkut pinissaa, kiisalu oqaluuserisassanut ilanngussinnissamut piumasaqaateqarsinnaanermut piffissaliussaq kingulleq sivikinnerpaamik sapaatit akunneri 8 sioqqullugit tamanut nalunaarutigissavai, taamaasilluni aktianik piginnittut piareersarnissamut naammaginartumik piffissaqassammata, oqaluuserisassanullu siunnersuutaasinnaasunik nassiussillutik, piffissaliussat marluusut malittarisassani allassimanngippata.

Teknikkikkut ineriartorneq eqqarsaatigalugu, elektronik atorlugu ataatsimeersuarnermut maleruagassat imatut allanngortinneqarput, ataatsimeersuarnernup tamakkiisumik elektronik atorlugu ingerlanneqarsinnaanera nalinginnaasumik amerlanerussuteqarnikkut malittarisassanut siunnessami eqqunneqarsinnaasunngorlugu.

Piginnaatitsissutit aningaasaatinik piginneqatigiiffiup aqutsisuinut tunniussaananik allanut tunniunneqartut piffissamut killiligaanngitsumut tunniunneqarsinnaalernerat nutaajuvoq. Aningaasanik piginneqatigiiffiup aqutsisuinut piginnaatitsissutit maannamutut ittumik qaammatit 12 sinnerlugit atuuttussanngorlugit tunniunneqarsinnaanngillat, ataatsimeersuarnermilu aalajangersimasumi siumut aalajangeriikkamik oqaluuserisassaqartumi aalajangigaassallutik.

Aktianik piginneqatigiiffiit nalunaarsorneqarnissaannut ulloq nalunaarsorneqarfissaq pillugu aalajangersagaq piginneqatigiiffiit pillugit inatsimmut ilaavoq. Ulloq nalunaarsorneqarfik, ullup ataatsimeersuarnernup pinissaa sapaatit akunneranik ataatsimik sioqqullugu aalajangersagaasoq, tassaavoq ataatsimeersuarnermi kikkut peqataasinnaanerannut taaseqaaasinnaanerannullu killiliussaq. Aningaasaatinik piginnittuunermut pissutsit, ullormi nalunaarsuiffiusumi pineqartoq pillugu piginnittunik allattuiffimmi nalunaarsugaasut. kiisalu piginnittuunermut pissutsit pillugit nalunaarutit piginnittunik allattuiffimmut nalunaarsugaanissaat siunertaralugu aktianik piginneqatigiiffiup ullormi nalunaarsuiffiusumi tigusimasai tunuliaqutaralugit aktianik piginnittup aktianik pigisaqassusia taasisinnaassusialu naatsorsorneqartarput. Piginneqatigiiffiup piginnittunik allattuiffia tassaavoq aningaasaatinik

piginneqatigiiffimmi pineqartumi inuit aktianik piginneqatigiissutinilluunniit piginnittut tamarmiusut ataatsimoortumik allattorsimaffiat.

Nalunaarsugaanerup ulluligaaneranut maleruagassaq piginneqatigiiffinnut pappialanik nalilinnik niuerfinni niuerutaasinnaasunut pinngitsoorani malitassaavoq, tamannalu peqqussummut qulaani taaneqartumut naapertuuppoq. Piginneqatigiiffiit pappialanik nalilinnik niuerfinni niuerutaanngitsut andelselskabifillu nalunaarsugaanerup ulluligaaneranut maleruagassaq malissanerlugu namminneq aalajangissavaat.

Ataatsimeersuarnerup ingerlanneqarnissaa kingusinnerpaamik ullunik pingasunik sioqqullugu aktiaatillip ataatsimeersuarnermut peqataanissaata aktianik piginneqatigiiffimmut nalunaarutigineqarsimanissaa piginneqatigiiffiit pillugit inatsit malillugu malittarisassani aalajangersarneqarsinnaavoq.

3.10. Suaassutsinut ikinnerussuteqartunut kisitsisitigut siunniussat anguniakkallu

Aningaasaatinik piginneqatigiiffiup aqutsisuini qullerpaani, nalinginnaasumik siulersuugajuttuni, suaassutsit naligiimmik agguataarsimangippata, suaassutsinut ikinnerussuteqartunut kisitsisitigut siunniussanik aalajangersaasoqarnissaa piginneqatigiiffiit pillugit inatsimmi piumasaqaataavoq. Tamatuma saniatigut aningaasaatinik piginneqatigiiffimmi aqutsisut sinnerisa assigiinngitsunik qaffasissuseqartut akornanni suaassutsit ataani erseqqinnerusumik nassuiarnerattut naligiimmik agguataarsimangippata, suaassutsit ikinnerussuteqartut amerliniarlugit anguniakkat suliarineqassapput.

Aningaasaatinik piginneqatigiiffiit ilaatinneqartut tassaapput naalagaaffiup aktianik piginneqatigiiffii, piginneqatigiiffiit pappialanik nalilinnik niuerfinni niuerutaasinnaasut kiisalu aningaasaatinik piginneqatigiiffissuit. Aningaasaatinik piginneqatigiiffissuarnik oqarnermi pineqarput piginneqatigiiffiit ukiuni naatsorsuiffiusuni tulleriinni marlunni tunngaviit tulluuttut ilaannik marlunnik qaangiisut:

- 1) Oqimaaqatigiissitsinerup katinnera 156 mio. kr.-inik annertussuseqartoq,
- 2) kaaviiartitat ilanngaateqartinnagit 313 mio. kr.-inik annertussuseqartut aamma
- 3) sulisut suliffissaq tamaat sulisartut agguaqatigiissillugit 250-iusut.

Aningaasaatinik piginneqatigiiffiup aqutsisuini qullerpaani suaassutsinut ikinnerussuteqartunut kisitsisitigut siunniussat piginneqatigiiffiit namminneq aalajangersassavaat, piginneqatigiiffinni ataasiakkaani pissutsit atuuttut mianeralugit. Taamaasilluni kisitsisitigut siunniussat suut piviusorsiortuunersut piginneqatigiiffiit namminneq aalajangissavaat. Taamaasiornikkut aamma suliaqarfinni assigiinngitsuni annertuumik assigiinngissuteqartoqarnera ilanngullugu mianerineqareerpoq. Inuussutissarsiutit ilaat allanit arnanut pilerinarnerupput, taamaattumik kisitsisitigut siunniussanik tamanut aalajangersaasoqanngilaq.

Tamatuma saniatigut piginneqatigiiffiit taakkorpiaat, piginneqatigiiffik 50-inik sinnerlugilluunniit sulisoqarpat, piginneqatigiiffiup aqutsisuini assigiinngitsunik qaffasissusilinni suaassutsit ikinnerussuteqartut amerlisinniarlugit anguniagaqartussaapput.

Suiaassutsinulli naligiimmik agguaassisoqarsimappat, tassalu arnat ikinnerpaamik 40 procentiullutik, imaluunniit angutit ikinnerpaamik 40 procentiullutik, kisitsisinik siunniussanik anguniakkanillu aalajangersaanissamat pisussaaffeqartoqanngilaq. Taamaasilluni arnanut angutinillu 40/60 procentimik agguaassisimaneq naligiissitsinertut isigineqarpoq. Suiaassutsini sorliit 40 procentiunersut imaluunniit 60 procentiunersut apeqqutaatinneqanngilaq.

Suiaassutsit ikinnerussuteqartut pillugit kisitsisitigit siunniussat anguniakkallu pillugit piginneqatigiiffiit ukiumoortumik naatsorsuutit pillugit inatsimmi maleruagassat malillugit nalunaaruteqartassapput. Ukiumoortumik naatsorsuutit pillugit inatsisip Kalaallit Nunaannut atuuttussanngortinnera pillugu peqqussutip tulluarsarnissaa aggersoq aqutigalugu maleruagassat taakku Kalaallit Nunaannut atuuttunngortinneqassapput.

3.11. Aqutsinermut aaqqissuussinerit

Aningaasaatinik piginneqatigiiffiit aqutsinermik aaqqissuussinerminnut piginneqatigiiffiit pillugit inatsisikkut eqaalluinnartumik periarfissinneqarput. Aqutseriaatsit pingaarnerit tulluuttut inatsimmi pineqarput:

1. Aqutsinermut aaqqissuussineq, aningaasaatinik piginneqatigiiffiup pingaarnertigit periusissiatigullu aqunneqarnera siulersuisunit isumagineqarluni, ulluinnarni aqutsineq qullersaqarfimmit isumagineqartoq.
2. Aqutsinermut aaqqissuussineq, aningaasaatinik piginneqatigiiffiup pingaarnertigit periusissiatigullu aqunneqarnera, soorlu aamma ulluinnarni aqunneqarnera qullersaqarfimmit isumagineqartoq.

Aktianik piginneqatigiiffimmi qullersat nakkutilliisoqarfimmit qullersanik nakkutilliisuusumit atorfinitsinneqartarput. Andelsselskabit nakkutilliisoqarnissartik namminneq aalajangissavaat.

Aningaasaatinik piginneqatigiiffiup qullersanit tamatigit aqunneqartarnera aqutsinermut aaqqissuussinerit atorqeersinnaasut assigiissutigivaat. Tamanna andelsselskabinut nutaajuvoq, andelsselskabiit maannamat siulersuisunit aqunneqarsinnaasaraluaramik, andelsselskabi peqatigisaanik qullersaqarani.

Piginneqatigiiffilli qullersaqarlunilu siulersuisoqarpat, qullersat ulluinnarni aqutsineq isumagissavaat, siulersuisut pingaartigit periusissiatigullu aqutsineq isumagissagaat.

Taamaasilluni piginneqatigiiffiit pillugit inatsit malillugu aqutsinermut aaqqissuussinerit tulluuttut andelsselskabit toqqarsinnaavaat:

- Aqutsisut, taamaallaat qullersanit inuttaqartut,
- aqutsisut, qullersanit siulersuisunillu inuttaqartut, imaluunniit
- aqutsisut, qullersanit nakkutilliisoqarfimmillu inuttaqartut.

Aqutsisut taamaallaat siulersuisunik inuttaqartillugit aqutseriaatsimik toqqaanissaq piginneqatigiiffiit pillugit inatsit malillugu periarfissaajunnaarpoq.

Aktianik piginneqatigiiffinni aqutsinermut aqqissuussinerit tulluuttut piginneqatigiiffiit pillugit inatsit malillugu toqqarneqarsinnaapput:

- Aqutsisut, qullersanik siulersuisunillu inuttaqartut, imaluunniit
- aqutsisut, qullersanit nakkutilliisoqarfimmillu inuttaqartut.

Nakkutilliisoqarfik aqutsinermik suliaqarfiuvoq nutaaq, piginneqatigiiffiit pillugit inatsisikkut eqqunneqartoq. Nakkutilliisoqarfik siulersuisunut taarsiullugu aktianik piginneqatigiiffinnit andelselskabinillu atorneqarsinnaavoq. Qullersanik nakkutilliineq, qullersanik atorfinitsitsineq soraarsitsinerlu ilanngullugit, kiisalu piginneqatigiiffiup aningaasatigut upalungaarsimanerata qaqugukkulluunniit illersorneqarsinnaanerata nakkutiginissaa nakkutilliisoqarfiup suliassaasa ilagaat. Taamaasilluni nakkutilliisoqarfiup suliassai siulersuisut suliassaannut sorpassuartigut assingussuteqarput, siulersuisulli assignagit soorlu piginneqatigiiffimmik pingaarnertigut periusissiatigullu aqutsineq nakkutilliisoqarfiup akisussaaffiginngilai, nakkutilliisoqarfillu piginneqatigiiffik sinnerlugu atsiorsinnaatitaanani.

Piginneqatigiiffiit pillugit inatsimmi qitiusumik aqutsisuutitat qullersatullu aqutsisuutitat immikkoortinneqarput.

Qitiusumik aqutsisuutitat ukuupput:

- Piginneqatigiiffinni qullersaqartuni siulersuisoqartunilu siulersuisut,
- piginneqatigiiffinni taamaallaat qullersaqartuni qullersat, aamma
- piginneqatigiiffinni qullersaqartuni nakkutilliisoqarfeqartunilu qullersat.

Qullersatut aqutsisuutitat ukuupput:

- Piginneqatigiiffinni qullersaqartuni siulersuisoqartunilu siulersuisut,
- piginneqatigiiffinni taamaallaat qullersaqartuni qullersat, aamma
- piginneqatigiiffinni qullersaqartuni nakkutilliisoqarfeqartuninilu nakkutilliisoqarfiit.

Taamaasilluni qitiusumik aqutsisuutitat tassaapput siulersuisut. Piginneqatigiiffik siulersuisoqanngippat, qullersat qitiusumik aqutsisuutitaassapput – aamma piginneqatigiiffik nakkutilliisoqarfeqaraluarpuunniit.

Qullersatut aqutsisuutitat tassaapput siulersuisut. Piginneqatigiiffik taamaallaat qullersaqarpat, qullersat tassaassapput qullersatut aqutsisuutitat. Piginneqatigiiffiup aqutsisui tassaappata qullersat nakkutilliisoqarfillu, nakkutilliisoqarfik qullersatut aqutsisuutitaassaaq.

3.12. Piginneqatigiiffinni pappialanik nalilinnik niuerfinni niuerutaasinnaasutut allassimasuni aqutsisunut ilaasortat angusat malillugit aningaasarsiaqartitaanissaannut maleruagassat

Piginneqatigiiffinnut pappialanik nalilinnik niuerfinni niuerutaasinnaasutut allassimasunut piginneqatigiiffiup aqutsisuinut ilaasortat angusat malillugit aningaasarsiaqartitaaneranni ammasuunissaq pillugu maleruagassanik eqqussisoqarpoq.

Taamaasilluni peqqussut atuutilereeriparpat, aqutsisunut ilaasortat angusat malillugit aningaasarsiaqartitaanissaat pillugu nutaamik isumaqatigiissuteqartoqarnissaa piginneqatigiiffiup kissaatigippagu, piginneqatigiiffiup qullersaasa angusat malillugit aningaasarsiaqartitaanissaannut najoqqutassanik pingaarnernik qullersatut aqutsisuutitat suliaqassapput. Taamaasilluni piginneqatigiiffiup aqutsisuinut angusat malillugit aningaasarsiaqartitsinissaq pillugu aalajangersimasunik piginneqatigiiffik isumaqatigiissuteqartinnagu, najoqqutassat piginneqatigiiffiup ataatsimeersuarnerani suliarineqareersimassapput akuerineqarsimassallutillu. Najoqqutassat piginneqatigiiffiup malittarisassaanut ilanngunneqassapput.

Piginneqatigiiffiup aqutsisuinut ilaasortanut aningaasarsiat nikerartut suulluunniit tamarmik angusat malillugit aningaasarsiaqartitsinermut ilaapput, taamaasillunilu aktianik tunngaveqartunik aningaasarsianut, soorlu aktianik pisinnaatitaanermut (aktieoptioner), aktianik nutaanik pissarsisinnaatitaanermut (warrants) kiisalu fantomaktianik taaneqartartunut killiligaanatik, aningaasaatinik piginneqatigiiffiup aktiaataasa nalingat tunngavigalugu pineqartuni aningaasarsiaqartitsisoqartarami. Taamaasilluni tapisiaqartitsinermik aaqquissuussinerit aktiaatinik tunngaveqanngitsut, angusat malillugit isumaqatigiissutit sakkussallu assigisaat, naggataagut aningasarsiarisassat siumut ilisimaneqanngiffigisaat ilaassapput. Akerlianilli aalajangersimasumik aningaasarsiat – qanorluunniit qaffasitsigigaluarpata – ilaatinneqassanngillat.

Piginneqatigiiffiup aqutsisuisa angusat malillugit aningaasarsiaqarnissaannut isumaqatigiissuteqarnermut suut tunngavigineqassanersut najoqqutassanit erseqqissumik takuneqarsinnaassaaq. Taamaasilluni najoqqutassanit minnerpaamik tulliuuttut takuneqarsinnaasariaqarput,

- kikkut angusat malillugit aningaasarsiaqartitaalersinnaanersut,
- tapisiat suut angusat malillugit aningaasarsiaqarnermut ilaatinneqarsinnaanersut,
- tapisiaqartitaanernut pingaarnertut piumasaqaatit suunersut,
- angusat malillugit aningaasarsiat maanna nalingisa missingernerat, aamma angusat malillugit aningaasarsiaqartitaanerup piffissamut qanoq siviutigisumut atuussinnaanera, aktianik pisinnaatitaanerup (optioner) atorluarnissaanut piffissaliussaasinnaasut ilanngullugit.

Najoqqutassat, oqaatigineqartutut ataatsimeersuarnermit akuerineqartussaasut, imatut ilusiligaassapput, aningaasaatinik piginneqatigiiffiup aqutsisuisa angusat malillugit aningaasarsiaqartitaanerannut pingaarnertut najoqqutassanut aktiaatillit isummersinnaassallutik, taamaattoqarpallu aktianik pisinnaatitaanermut (aktieoption) aaqqiinerit ilanngullugit.

Angusat malillugit aningaasarsiaqartitsinissamik isumaqatigiissutit nutaat, aqutsisunut ilaasortanut isumaqatigiissutigineqartut, najoqqutassani akuersissutigineqarsimasuni sinaakkusiussat iluanniissapput. Akerlianilli peqqussutip atuutilernera sioqqullugu isumaqatigiissutaasut angusat malillugit aningaasarsiaqartitsinermut maleruagassanit nutaanit kalluarneqassanngillat, najoqqutassanilu sinaakkusiussat iluiniinngikkaluarlutik atorunnaarnissamik tungaanut allannguuteqaratik atuussinnaallutik.

Aqutsisuni ilaasortanut angusat malillugit aningaasarsiaqartitsinerit piviusunngortut naatsorsuuserinermut maleruagassat naapertorlugit piginneqatigiiffiup ukiumoortumik nalunaarusiaani takuneqarsinnaassapput.

Najoqqutassat allaaserinerat ima ilusiligaassaaq, naatsorsuutinik nalunaarusiornermut ataqatigiinissaat qulakkeerneqassalluni. Taamaasilluni najoqqutassat akuersissutigineqarsimasut qullersaallutik aqutsisuusunit malinneqarnersut aktiaatillit takusinnaassavaat.

Angusat malillugit aningaasarsiaqartitsinermut maleruagassat taamaallaat piginneqatigiiffiup aqutsisuinut angusat malillugit aningaasarsianut najoqqutassanut tunngatitaapput. Taamaalilluni aqutsinermik sulisunut allanut sulisunulluunniit pingaarutilimmik suliaqartunut angusat malillugit aningaasarsiaqartitsineq ilaannngillat. Sulisulli taakku ajunngitsorsiassaasa aningaasaatinik piginneqatigiiffiup aningaasatigut inissisimanera il.il. eqqarsaatigalugit illersorneqarsinnaanissaannut aqutsisut akisussaasuupput.

3.13. Sulisut sinniisaat

Sulisut sinniisaannik qinersinerup ingerlannissaanut maleruagassat teknikkimut tunnganerusut ilaat inatsimmi allassimajunnaarput, nalunaarummili aalajangersagaallutik.

Maleruagassat maannamut atuuttut piginneqatigiiffiit pillugit inatsimmut annertuutigit ingerlateqqinneqarput, piginneqatigiiffinnulli sapinngisamik eqaatsumik periuseqartitsiniarluni, aqutsisut sulisullu isumaqatigiissuteqarnerisigut maleruagassat aalajangersimasut ilarpassui avaqqunneqarsinnaapput. Avaqqunneqarnissaat isumaqatigiissutigineqarsinnaanngippat, maleruagassat atuuttut uterfigineqassapput.

3.14. Aningaasaatinik annertusisitsinerit

Aningaasaatinik piginnittut isumaqatigiillutik suleriaatsit ilaannik, namminneq aalajangiinerminnut qulakkeerinnittussatut siunertaqartunik arlaqartunik atuinnginnissamut piginneqatigiiffiit pillugit inatsisikkut periarfissaqalerput.

Assersuutigalugu piginneqatigiiffimmi aningaasaatit qaffanneqarnissaannik aalajangiinermut atatillugu, aqutsisut nassuiaataannik suliarinnittoqarnissaanik kukkunersiuisullu oqaaseqaateqarnissaannik piumasaaqat atorneqassanngitsoq aningaasaatinik piginnittut isumaqatigiillutik aalajangersinnaavaat.

3.15. Aningaasaatit ilanngarnerat (aningaasaatinik ikilisitineq il.il.)

Siusinnerusukkut oqaatigineqareersutut aningaasaatinik piginnittut isumaqatigiillutik suleriaatsit ilaannik, namminneq aalajangiinnerminnut qulakkeerinnittussatut siunertaqartunik arlaqartunik atuinninnissamat piginneqatigiiffiit pillugit inatsisikkut periarfissaqalerput. Assersuutigalugu aningaasaatit ikilisinneqarnissaannik kissaateqarneq pillugu nassuiaammik aqutsisut aningaasaatinik piginnittunut saqqummiussinissaannik piumasaqaat piginneqatigiiffiit pillugit inatsit malillugu avaqqunneqarnissaavoq, tamannalu aktianik piginneqatigiiffinnut andelsselskabinullu atuuppoq.

Assersuutigalugu piffissap qiteqqunnerani oqimaaqatigiissitsinermik suliaqanngikkaluarluni aningaasaatinik ikilisisinissaq illersorneqarsinnaasoq aqutsisut isumaqarpata, avataanit siunnersorneqarnissap pinnginnissaa aqutsisut piginneqatigiiffiit pillugit inatsit malillugu toqqarsinnaavaat.

Aningaasalli atornagit nalillit allat atorlugit agguaassinermi aningaasaatinillu ikilisisinermi naliliinermut nalunaarusiortoqarnissaannik piumasaqaat piginneqatigiiffiit pillugit inatsimmi ingerlateqqinneqarpoq.

Amigartoorutit matussusernissaannut aningaasaatinik ikilisisinermi kukkunersuiusumit nalunaarusiortoqarnissaannik piumasaqaateqartoqanngilaq.

Aningaasat sinneqartoorutit, kiisalu pissamaatit pituttugaanngitsut ukiumoortumik nalunaarutip saqqummiunneqartup kingulliup kingorna pilersimasut tunniunneqarsinnaasunnngorsimasulluunniit, immikkut ittumik sinneqartoorutininik akiliinermi atorreqarsinnaanerit nutaajuvoq, aningaasat agguaanneqareersimannginerat, atorreqareersimannginerat allamulluunniit atugassiissutaasimannginerat piumasaqaatigalugu. Pissamaatit pituttugaanngitsut aningaasanik piginneqatigiiffiit ukiumoortumik nalunaarutaani akuerineqartumi allassimasut, immikkut ittumik sinneqartoorutininik akiliinermut suli atorreqarsinnaapput.

Ukiumoortumik nalunaarusiami ullormit oqimaaqatigiissitsiffiusumit qaammatini siullerni 6-ni immikkut ittumik sinneqartoorutininik agguaassisoqartillugu, piffissap qiteqqunnerani oqimaaqatigiissitsinissaq piginneqatigiiffinnut piumasaqaataanngilaq, ukiumoortumilli nalunaarusiami kingullerpaami oqimaaqatigiissitsineq piffissap qiteqqunnerani oqimaaqatigiissitsinertut atorreqarsinnaanersoq aktianik piginneqatigiiffimmi aqutsisut namminneq nalilissavaat. Ullup oqimaaqatigiissitsiffiusup kingorna qaammatit 6 sinnerlugit qaangiunneranni immikkut ittumik sinneqartoorutininik agguaassinermi, piffissap qiteqqunnerani oqimaaqatigiissitsinerit maannamutut ililluni suliarineqartassapput.

Aningaasaatinik ikilisisinerit misilittakkat malillugit tamarluinnangajammik tamatuminnga ammasumik nalunaaruteqarnermiit qaammatit pingasut qaangiunneranni allannngortinnagit piviusunnngortinneqartarmata, piginneqatigiiffiit pillugit inatsisip atuutilerneratigut aningaasaatit ikilisinissaannut aalajangernerup ammasumik nalunaarutigineqarnera ingerlaannartumik nalunaarsuisoqartalerpoq. Aningaasaatilli aallaqqaammut aalajangerneqartutut ikilisinneqarnissaat illersorneqarsinnaanersoq aqutsisut qaammatit pingasut piffissaliussaasut qaangiutsinnagit nalilissallugu pisussaaffigaat. Aningaasaatinik ikilisisinerup piviusunnngortinnissaa illersorneqarsinnaanngitsoq aqutsisut nalilerpassuk,

anigaasaatinik ikilisitsinerup piviusunnngortinneqannginnissaa aqutsisut Erhvervsstyrelsimut nalunaarutigissavaat.

Qaammatit pingasut piffissaliussat qaangiunneranni anigaasaatit nammineerluni ikilisinneqannginissaannik piginneqatigiiffiit Erhvervsstyrelsimut nalunaarsinnaapput. Taamaasilluni anigaasanik pisassallit nalunaaruteqarnissaannut piffissaliussaq sapaatit akunnerinik 7-nik siviussuseqartoq qaangiukkaangat, anigaasanik tunniussinikkut imaluunniit immikkut ittumik pissamaatissanut nuussinikkut anigaasaatinik ikilisitsineq piviusunnngortinneqassasoq aqutsisut Erhvervsstyrelsimut nalunaarutigisinnaavaat. Aammattaq taamaassappat anigaasaatinik ikilisitsineq aatsaat aqutsisut tamatuminnga nalunaaruteqarpata piumaartoq aqutsisut Erhvervsstyrelsimut nalunaarutigisinnaavaat. Anigaasaatinilli ikilisitsinerup nalunaarsorneqarnera pillugu nalunaarut anigaasaatit ikilisinneqarnissaannik aalajangernerup kingorna kingusinnerpaamik ukiup ataatsip qaangiunnerani, kingusinnerpaamillu ukiumoortumik nalunaarusiap, anigaasaatit ikilisinneqarnissaannik aalajangernerup ulluanik imaqartup nassiunneqarnissaanut piffissaliussap qaangiunnerani tiguneqareersimassaaq.

3.16. Anigaasaatinut piginnittuussutsit nammineq pigisat

Piginneqatigiiffiit pillugit inatsisikkut aktianik piginneqatigiiffiit aamma andelsselskabit anigaasaatinik piginnittuussutsinik nammineq pigisanik pissarsisinnaalerput.

Anigaasaatinut piginnittuussutsinik nammineq pigisanik pisineq iluaqutaasumik sakkussaavoq, taakkunatigut piginneqatigiiffiup anigaasaqarnikkut aaqquissuusaanera piginneqatigiiffiup naleqqussarsinnaagamiuk tulluarsarsinnaalluguluunniit, taamaasiornermigullu piginneqatigiiffiup nammineq anigaasaataasa tassanilu allat anigaasaataasa akornanni eqqortumik oqimaaqatigiissoqarnissaa anguneqassalluni. Anigaasaatinut piginnittuussutsinik pisiortorneq sinneqartoorutitut taartaasinnaavoq.

Taamaasilluni andelsselskabit namminneq piginneqataassutsiminnik pissarsisinnaanerannut inerteqqut atorunnaarsinneqarpoq, anigaasaatinik piginnittuussutsinik nammineq pigisanik pissarsineq aamma andelsselskabinut iluaqutaasumik sakkussaassasoq nalilerneqarmat, assersuutigalugu kinguaariit nikinneranni.

Piginneqatigiiffiit pillugit peqqussutit aappaatigut nammineq aktiaatigisanik pissarsinissamut piumasaqaatit atuuttut ilaat atorunnaarsinneqarput. Taamaalilluni nammineq aktiaatigisat aktiatigut anigaasaatit annerpaamik 10 procentiinik annertussuseqartussaanerattut ittumik maanna killilersuisoqarunnaarpoq. Aktianik piginneqatigiiffiit andelsselskabillu namminneq aktiaatiminnik pissarsigaangamik piumasaqaatit sakkukilliat, piginneqatigiiffiit pillugit peqqussutit aappaata malitsigisai eqqortittussaavaat. Andelsselskabit peqqussutip atuuffianut ilaatinneqanngillat, piginneqatigiiffiilli pillugit peqqussutip aappaanni piumasaqaatit, nammineq aktiaatinik pissarsinermi aktianik piginneqatigiiffinnut atuuttut, aamma andelsselskabinut naleqquttuussasut nalilerneqarpoq, taamaasilluni anigaasanik pisassalinnik illersuineq aktianik piginneqatigiiffinnut andelsselskabinullu assigiissunngussamat.

Anigaasat nalinginnaasumik iluanaarutininik agguassinissamut atorneqarsinnaasut, tassalu anigaasanik piginneqatigiiffiup ukiumoortumik nalunaarusiaani kingullerpaami

takuneqarsinnaasut, aningaasaatinik piginneqatigiissutinik pissarsissutigisinnaanerit nutaajuvoq, tamannalu aningaasaatit pillugit peqqussummut naapertuuppoq. Taamatut iliornikkut anpartsselskabit namminneq piginneqataassutsiminnik pissarsinissaannut inerteqqut atorunnaarsinneqarpoq, aktianillu piginneqatigiiffiit aningaasaatit 10 procentiat tikillugu killiliussaq atuuttoq qaangerlugu namminneq aktiaatiminnik pissarsisinnaalerlutik. Aningaasaatinut piginneqatigiissutinik nammeneq pigisanik pissarsinissamut ataatsimeersuarnerup aqutsisunut piginnaatitsisussaananerit piunasaqaat suli atuuppoq.

Piginneqatigiiffiup ukiumoortumik nalunaarutaani kingullerpaami pissamaatit pituttugaanngitsut aningaasaatinik piginneqatigiissutit qassit pissarsiarineqarsinnaanerannut aalajangiisuupput. Taamaasilluni piginneqatigiiffiup pissamaatai pituttugaanngitsut ikilissagaluarpata, tamanna aningaasaatinik piginneqatigiissutinut pissarsiarineqareersimasutut allanneqarsimasunut toqqaannartumik sunniuteqassanngilaq. Aningaasaatinilli piginneqatigiiffiup qaqugukkulluunniit aningaasatigut illersorneqarsinnaasumik upalungaarsimanissaata qulakkeernissaa aqutsisut ataavartumik pisussaaffigaat.

3.17. Atorunnaarsitaaneq (atorunnaarsitsineq il.il.)

Atorunnaarsitsinermit iluanaarutinit, soorlu pigisani annertuunik atugassaateqartoqartillugu, pigisallu tamatumunnga attuumassuteqanngitsumik naammassillugit suliarineqarsinnaatinnagit, siumoortumik agguaassigallarnissaq piginneqatigiiffiit pillugit inatsit malillugu ajornanngilaq. Saniatigulli aatsaat toqqissisimanartumik qularnaveeqqusiisoqarsimappat aatsaat siumoortumik agguaassigallartoqarsinnaavoq. Siumoortumik agguaassinermut atatillugu atorunnaarsitsisartumik atuinermit aqutsisut akisussaananerannut maleruagassat nalinginnaasut atorineqassapput.

Ukiup naatsorsuiffiusup naareernerani, ukiumoortumilli nalunaarusiap nassiunneqarnissaanut piffissaliussaq sioqqullugu piginneqatigiiffik atorunnaarsinneqarpat, piginneqatigiiffiup ukiumoortumik nalunaarusiaq pineqartoq piginneqatigiiffiit pillugit inatsit malillugu suliarinngissinnaavaa, ukiumoortumik nalunaarusiap pineqartup nassiunneqarnissaanut piffissaliussap naannginnerani atorunnaarsitsinerup naammassinera pillugu nalunaarut, atorunnaarsitsinermit inaarutaasumik naatsorsuutit ilanngullugit, Erhvervsstyrelsimit tiguneqareersimappata.

Akiliisinnaajunnaarnermut pinngitsaaliissummillu atorunnaarsitaanermit atatillugu pigisanik agguaassisarnermut eqqartuussiviup immikkut ittumik kukkunerisuiusumik pigisanik agguaassisarnermut eqqartuussivimmit toqqaagasumik toqqaasinnaalernerit piginneqatigiiffiit pillugit inatsisikkut eqqunneqarpoq.

Piginneqatigiiffinnik imaluunniit naatsorsuuserinermit immikkut ilisimasallit pillugit maleruagassat piginneqatigiiffiit pillugit inatsimmi ingerlateqqinneqanngillat.

3.18. Kattunneq arlalinnagortitsinerlu

Aningaasaatinik piginnittut (tassalu aktiaatillit kiisalu andelselskabini piginneqataasut) aalajangiinnerminnut atatillugu, aamma kattunnermit arlalinnagortitsinernullu atatillugu,

isumaqatigiillutik uppersaaitit allakkiat ilaannik atuinnginnissamut piginneqatigiiffiit pillugit inatsisikkut periarfissaqalerput. Uppersaaitit allakkiat pineqartut atuinnginnissaannut aningaasaatinik piginnittut tamarluinnarmik tamatumunnga isumaqataanissaat piumasaqaataavoq. Aningaasaatinik piginnittoq ataasiinnaq tamatumunnga isumaqataangippat, uppersaaitit allakkiat pineqartut suliarineqassapput.

Kattunermi uppersaaitit allakkiat tulluuttut atorneqannginnissaat isumaqatigiilluni toqqarneqarsinnaavoq, piginneqatigiiffiit peqataasut aktianik piginneqatigiiffiuppata imaluunniit andelsselskabiullutik:

- Kattunneq pillugu nassuiaat.
- Piffissap qiteqqunnerani oqimaaqatigiissitsineq.
- Akissarsiat pillugit oqaaseqaat.

Kattunermi andelsselskabit kisimik peqataappata, akiligassa qarfiillu inissisimanerat pillugu naliliisartup nalunaarutaani akiligassa qarfiit naammattumik qulakkeer neqarsimanerat inernilunneqarpat, kattunermut pilersaarutip suliarineqannginnissaa toqqarneqarsinnaavoq. Taamaappat kattunerusup piviusunngortinnissaa ingerlaannaq aalajanger neqarsinnaavoq – kattunnissamut pilersaarutip tamanut saqqummiunneqarnissaa, akiligassa qarfiillu tamatumunnga atasumik piumasaqaamminnik nalunaaruteqarnissaannut piffissaliussaq utaqeqqaarnagit.

Aammattaaq assersuutigalugu akiligassa qarfiit kattunerusup kingorna ajornerusunik atugassa qarfitaanissaasa ilimagisariaqarneranik naliliisartooq naliliisimappat, akiligassa qarfiit piumasaqaatiminnik nalunaaruteqarnissamut periarfissa qarfitaanerisa assigisaannik nalunaaruteqarnissamut taarsiullugu periarfissinneqarpat, taava akiligassa qarfiit inissisimanerat pillugu naliliisartup nalunaarutaanik suliaqartoqassanngitsoq piginneqataassuteqartut isumaqatigiillutik aalajangersinnaavaat.

Akerlianilli aktianik piginneqatigiiffik ataaseq arlallilluunniit kattunermut peqataappata, kattunnissamut pilersaarutip suliarineqarnissaa tamanullu saqqummiunneqarnissaa pinngitsoortinneqarsinnaanngillat. Tamanna peqqussutikkut piumasaqaataanerata kinguneraa.

Arlalinngortitsiner mi uppersaaitit allakkiat tulluuttut atorneqannginnissaat isumaqatigiilluni toqqarneqarsinnaavoq, piginneqatigiiffiit peqataasut aktianik piginneqatigiiffiuppata imaluunniit andelsselskabiullutik:

- Arlalinngortitsineq pillugu nassuiaat.
- Piffissap qiteqqunnerani oqimaaqatigiissitsineq.
- Akissarsiat pillugit oqaaseqaat.

Arlalinngortitsiner mi piginneqatigiiffiit kisimik peqataappata, akiligassa qarfiillu inissisimanerat pillugu naliliisartup nalunaarutaani akiligassa qarfiit naammattumik qulakkeer neqarsimanerat inernilunneqarpat, arlalinngortitsiner mi pilersaarutip suliarineqannginnissaa toqqarneqarsinnaavoq. Taamaappat arlalinngortitsiner up piviusunngortinnissaa ingerlaannaq aalajanger neqarsinnaavoq – arlalinngortitsinissamut pilersaarutip tamanut saqqummiunneqarnissaa, akiligassa qarfiillu tamatumunnga atasumik piumasaqaatiminnik nalunaaruteqarnissaannut piffissaliussaq utaqeqqaarnagit.

Peqqussutikkut piumasaqaatip malitsigisaanik arlalinngortitsinissamut pilersaarutip atunnginnissaa aktianik piginneqatigiiffinnut ajornarpoq.

3.19. Allannngortitsineq

Aktianik piginneqatigiiffiit andelsselskabinngorlugit killormoortuanillu allannngortitsineq pillugu aktianik piginneqatigiiffiit pillugit inatsimmi aamma andelsselskabit pillugit inatsimmi siusinnerusukkut maleruagassaasimasut, aaqqissuinikkut allannnguutitalerlugit erseqqissaanertalerlugillu piginneqatigiiffiit pillugit inatsimmi annerusutigut ingerlateqqinneqarput, andelsselskabinilli killilimmik akisussaaffilinnik (a.m.b.a.) aktianik piginneqatigiiffinnut killormoortuanillu allannngortitsineq pillugu maleruagassat erseqqissut nutaatut ilanngunneqarput.

Kattunnermut maleruagassanut atatillugu pisariillisaanerit piginneqatigiiffiit pillugit inatsimmmut eqqunneqartut ilaat aamma andelsselskabit killilimmik akisussaaffillit (a.m.b.a.) aktianik piginneqatigiiffinnut allannngortinneqartarnerat eqqarsaatigalugu eqqunneqarput. Taamaasilluni allannngortitsinermut nassuiaatip, piffissap qiteqqunnerani oqimaaqatigiissitsinerup akissarsiallu pillugit oqaaseqaatip ilatinnginnissaat isumaqatigiissutigalugu toqqaasoqarsinnaavoq.

Andelsselskabinik aktianik piginneqatigiiffinnngortitsilluni allannngortitsinermi, allannngortitsinermut pilersaarut il.il. tamanut saqqummiuteqqaarnagit allannngortitsinerup ingerlaannaq piviusunngortinnissaa aamma toqqarneqarsinnaavoq. Piginneqatigiissutinik piginnittut aktiaatillillu tamarmik tamatumunnga isumaqataanissaat piumasaqaataavoq, akiligassaqarfiillu inissisimanerat pillugu naliliisartup nalunaarutaani allannngortitsinerup kingorna akiligassaqarfiit naammaginatimik qulakkeerinniffigineqarsimanerat inerniliussaasusaalluni.

3.20. Naalagaaffiup aktianik piginneqatigiiffiutaannut maleruagassat immikkut ittut

Naalagaaffiup aktianik piginneqatigiiffiutaannut maleruagassat piginneqatigiiffinnullu tunitsivinni maleruagassaqartuni aktianik niuernissamut akuerisaasunut maleruagassat siunertaraat piginneqatigiiffinni pineqartuni ineriartornermut kikkut tamarmik malinnaasinnaanermut periarfissaqarnissaat. Maleruagassat marluusut assigiilluinnangajapput, piginneqatigiiffiit taakku ammasuuneq paasiuminartuunerlu eqqarsaatigalugit naligiissikkumallugit.

Naalagaaffiup aktianik piginneqataaffiutaannut maleruagassat immikkut ittut piginneqatigiiffiit pillugit inatsisikkut imatut allannngortinneqarput, piginneqatigiiffiit naalagaaffiup aktianik piginneqatigiiffiutaannit pigineqartut inatsimmi maleruagassat immikkut ittut naalagaaffiup aktianik piginneqatigiiffiutaannut atuuttut siunissami malittussaajunnaarlugit.

Pissutsit pingaaruteqartut, piginneqatigiiffissuup siunissaanut, sulisunut, aktiaatilinnut kiisalu akiligassaqarfinnut pingaaruteqartussat isumaqarfigineqartut pillugit piginneqatigiiffik piginnittuusooq piginneqatigiiffissup tungaanit oqaaseqaateqassaaq. Taamaasilluni piginneqatigiiffiup piginnittuusup paasissutissat piginneqatigiiffinnit pigisamineersut

ilannguttassavai, taakku piginneqatigiiffissuarmi ataatsimoortumi ineriartormik kikkut tamarmik malinnaasinnaanernut tulluartauppata.

Aktianik piginneqatigiiffik nunami EU-mut imaluunniit EØS-imut ilaasortaasumi niuerfimmi maleruagassaqartumi aktiaatinik niuersinnaatitaasoq pineqarpat, piginneqatigiiffiup piginneqatigiiffiit pillugit inatsimmi naalagaaffiup aktianik piginneqatigiiffiutaannut maleruagassat immikkut ittut malissallugit pisussaaffiginngilaa.

4. Peqqussutissat missingiummut Kalaallit Nunaanni pissutsit kingunerannik allannguusissatut siunnersuutit

Peqqussutissatut missingiummi nassiunneqartumi danskit maleruagassaannut naleqqiullugu Kalaallit Nunaanni pissutsit malitsigisaannik allannguutissat arlaqartut siunnersuutigineqarput. Pingaartumik tulliuttut pineqarput:

4.1. Maleruagassat, EU-mut ilaasortaannermik piunasaqaatitaqartut

Kalaallit Nunaat EU-mut ilaasortaannimmatt, maleruagassat EU-mut ilaasortaannermik piunasaqaatitaqartut peqqussutissatut missingiummut ilanngunneqanngillat. Tassani killeqarfiit akimorlugit kattunneq, killeqarfiit akimorlugit arlalinngortitsineq kiisalu angerlarsimaffimmik killeqarfiit akimorlugit nuussineq pillugit maleruagassat pineqarnerupput.

4.2. Piginneqatigiiffimmi pissutsit pillugit paasissutissanik il.il. Erhvervsstyrelsimut nalunaaruteqarnissamut piffissaliussat

Aktianik piginneqatigiiffiit pillugit inatsit aamma andelselskabit pillugit inatsit siusinnerusukkut atuuttut assigalugit, pissutsit pinngitsoorani nalunaarsugassaasut nalunaarsorneqarnissaat siunertaralugu Erhvervsstyrelsimut (siusinnerusukkut Erhvervs- og Selskabsstyrelsimut) nalunaarutiginnissaannut piffissaliussanik arlaqartunik piginneqatigiiffiit pillugit inatsit imaqarpoq.

Teknikkikkut ineriartorneq eqqarsaatigalugu, pissutsit pisussaaffigalugu nalunaarsugassaasut Erhvervsstyrelsimut nalunaarutiginnissaannut piffissaliussat allanngortinneqarput, taamaasilluni piffissaliussat nalinginnaasumik sapaatit akunnerinik marlunnik sivisussuseqalersillugit. Taamaasilluni piffissaliussat ilaat siusinnerusukkut sapaatit akunneri sisamat tikillugit sivisussuseqarsimasut maanna sapaatit akunnerinik marlunnik sivisussuseqalersillugit allanngortinneqarput. Taamatut iliornikkut piginneqatigiiffiit pillugit paasissutissat, Erhvervsstyrelsimut qarasaasiaqarfiani tamanit alakkarneqarsinnaasumi nalunaarsugaasut sukkanerusumik nutarterneqartassapput.

Aktianik piginneqatigiiffiit pillugit inatsisimmi aamma andelselskabit pillugit inatsimmi maannamut atuuttuni piffissaliussanut naleqqiullugit, aktianik piginneqatigiiffiit pillugit inatsisip aamma andelselskabit pillugit inatsisip Kalaallit Nunaannut atuutsinneqalernissaat

pillugit peqqussutini atuuttuni Kalaallit Nunaanni pissutsit kingunerannik piffissaliussat sapaatit akunnerinik pingasunik sivitsorneqarput. Taamaasilluni peqqussutit atuuttut malillugit piffissaliussat ullumikkut sapaatit akunnerinik tallimanik aamma arfineq marlunnik sivilissuseqarput.

Nalunaarutit il.il. Erhvervsstyrelsimut nassiunnissaannut piginneqatigiiffiit pillugit inatsimmi sapaatit akunnerinik marlunnik piffissaliussat tamarmik sapaatit akunnerinut tallimanut sivitsorneqarnissaat peqqussutissatut missingiummi siunnersuutigineqarpoq.

4.3. Piginneqatigiiffimmut pisassatut piumasaqaatit il.il. nalunaarutiginissaannut kaammattuutitut Erhvervsstyrelsip qarasaasiaqarfiaatigut tamanut saqqummiunneqartunut akiligassaqarfiit aningaasaatinillu piginnittut qisuariaateqarnissaannut piffissaliussat

Akiligassaqarfiit aningaasaatinillu piginnittut, soorlu piginneqatigiiffimmut piumasaqaatitik piffissap aalajangersimasup qaangiutinnginnerani nalunaarutigeqqullugit piginneqatigiiffimmit kaammattorneqarunik, qisuariaateqartussaanagerat pillugu piginneqatigiiffiit pillugit inatsit aalajangersakkanik imaqarpoq.

Assersuutigalugu aningaasaatinik piginnittunut akiliutissanut aningaasaatit ikilisinnissaat piginneqatigiiffiup kissaatigippagu, aalajangersagaq atuutissaaq. Taamaasippat piginneqatigiiffiup akiligassaqarfii piginneqatigiiffiup qinnuigissavai piffissaliussap sapaatit akunnerinik sisamanik sisivussuseqartup qaangiutinnginnerani piumasaqaatitik piginneqatigiiffimmut nalunaarutigeqqullugit. Akiligassaqarfimmut kaammattuut Erhvervsstyrelsip qarasaasiaqarfiaatigut tamanut saqqummiunneqassaaq.

Piffissaliussat taamatut ittut sapaatit akunnerinut 7-nut sivitsorneqarnissaat peqqussutissatut missingiummi siunnersuutigineqarpoq. Taamaattoq piginneqatigiiffiit pillugit inatsimmi piffissaliussaq qaammatitut pingasunut aalajangersarneqarsimatillugu, peqqussutissatut missingiummi piffissaliussap sivitsorneqarnissaa siunnersuutigineqanngilaq.

4.4. Piginneqatigiiffimmi pissutsit pillugit nalunaarsuinerit siunissami taamaallaat Erhvervsstyrelsip qarasaasiaqarfiaatigut tamanut saqqummiunneqartassapput

Piginneqatigiiffimmi pissutsit pillugit nalunaarsukkat tamarmik Erhvervsstyrelsip qarasaasiaqarfiaatigut tamanut saqqummiunneqartarput, taamaasilluni paasissutissat piginneqatigiiffiit pillugit inatsit malillugu tamanit takuneqarsinnaasut qarasaasiakkut nittartakkami datacvr.virk.dk-mi takuneqarsinnaapput.

Aktianik piginneqatigiiffiit pillugit inatsisip aamma andelsselskabit pillugit inatsisip Kalaallit Nunaannut atuutsinneqalernissaat pillugu peqqussutit atuuttut malillugit kalaallit piginneqatigiiffii pillugit nalunaarsukkat aamma Atuagalliutini saqqummiunneqartartussaapput, Atuagalliutit qaammammut marloriarlutik Kalaallit Nunaanni piginneqatigiiffiit pillugit Erhvervsstyrelsip qarasaasiaqarfianut nalunaarsukkat pillugit paasissutissanik imaqartaramik.

Atuagalliutitigut tamanut saqqummiussisarneq ingerlateqqinneqassanngitsoq peqqussutissatut missiungiummi siunnersuutigineqarpoq, taamaasilluni kalaallit piginneqatigiiffii pillugit nalunaarsukkanik siunissami taamaallaat Erhvervsstyrelsi qarasaasiaqarfiatigut tamanut saqqummiussisoqartassalluni. Akiligassaqarfiit aningaasaatinillu piginnittut piunasaqaatiminnik saqqummiussinissamut kaammattorneqarnerminni qisuariarnissaannut piffissaliussap sapaatit akunnerinit sisamaniit arfineq marlunnut sivitsorneqarnissaanik immikkoortoq 4.3.-mi siunnersuummut atatillugu siunnersuut isiginiarneqassaaq.

4.5. Nammineerluni nalunaarsuineq

Attaveqatigiinnerup pinngitsoorani digitalimik pinissaa pillugu malerugassanik piginneqatigiiffiit pillugit inatsit malillugu aalajangersaasoqarsinnaavoq, piginneqatigiiffiit Erhvervsstyrelsi akornni attaveqatigiinnerup tamarmiusup digitalimik ingerlanissaa taakku ilaatigut kingunerissavaat, aqutsisoqarfiup nammineerluni nalunaarsueriaasianik digitaliusumik piginneqatigiiffinni pissutsit pillugit nalunaarsuinermut nammineerluni nalunaarsuinermut atugassamik atuneq ilanngullugu.

Piginneqatigiiffiit paasissutissanik il.il. pineqartunik aqutsisoqarfiup qarasaasiaqarfianut nammineerlutik nalunaarsuisarnissaat piginneqatigiiffiit pillugit aalajangersakkat ilaanni piunasaqaataavoq, nalunaarsuinerullu kingorna paasissutissat tamanit takuneqarsinnaalertassallutik.

Piginneqatigiiffimmit nalunaarfigineqarnerup kingorna aqutsisoqarfiup nalunaarsuisinnaanera pillugu maleruagassanik aqutsisoqarfiup aalajangersaanissaanut Erhvervsstyrelsimut piginnaatitsissummik ilanngussisoqarnissaa peqqussutissatut missiungiummi siunnersuutigineqarpoq.

4.6. Piginneqatigiiffiit pillugit inatsimmi naalagaaffiup piginneqatigiiffiit maleruagassat Namminersorlutik Oqartussat piginneqatigiiffiit atorsinnaanerannut periarfissat

Aktianik piginneqatigiiffiit pillugit inatsisip Kalaallit Nunaannut atuutsinneqalernissaa pillugu peqqussummi atuuttumi, taamanikkut Namminersornerullutik Oqartussat kissateqarnerisigut I § 2 a-mut aalajangersakkamik ilanngussisoqarpoq, piginneqatigiiffiit Namminersornerullutik Oqartussanit pigineqartut naalagaaffiup aktieselskabiinut malittarisassanik malinnittusaanerat pillugu Erhvervs- og Selskabsstyrelsi (maanna Erhvervsstyrelsi) malittarisassiorsinnaasoq, tamanna inuiaqatigiit immikkut ittumik soqutigisaasa pisariaqartippassuk. Tamanna tunuliaqutaralugu aqutsisoqarfik naalagaaffiup aktianik piginneqatigiiffiutaannut malittarisassat atorneqarnissaat pillugu Kalaallit Nunaannut nalunaarut nr. 755, 10. juli 2008-meersoq suliaraa. Nalunaarummit tulliuuttut takuneqarsinnaapput:

”§ 1. Aktieselskabini angisuuni, Namminersornerullutik Oqartussat, ingerlatseqatigiiffiit piginnittut ingerlatseqatigiiffinnut aqutaminnut attaveqarnerat assinganik attaveqarfisaanni (aktieselskabit Namminersornerullutik Oqartussanit pigineqartut) takuuk § 2 aktieselskabinut

inatsimmi, Kalaallit Nunaannut Kunngip peqqussutaatigut atuutilersinneqartoq, malittarisassanik naalagaaffiup aktieselskabiinut aktieselkabinut inatsimmiittoq aamma ukiumut naatsorsuutitut inatsimmiittut Kalallit Nunaannut Kunngip peqqussutatigut atuutilersinneqartut malissavaat, aamma najoqqutassani manna malillugu sananeqartuniit, takuuk imm. 2.

Imm. 2. Ingerlatseqatigiiffik angisuujunersoq naatsorsorniaraanni ukiumut naatsorsuutitut inatsimmi, Kalaallit Nunaannut Kunngip peqqussutaatigut atuutilersinneqartut, § 7, imm. 2 aamma 3 atuutissapput.

§ 2. Aktieselskabit mikisut akunnattumillu angissusillit Namminersornerullutik Oqartusanit pigineqartut pisussaaffeqanngillat naalagaaffiup aktieselskabiinut malittarisassanik malinninnissaminut, takuuk § 1, ingerlatseqatigiiffiup ileqqoreqqusaanni aalajangerneqarsimangippat, ingerlatseqatigiiffiup naalagaaffiup aktieselsbiinut malittarisassanik malinninnissaq.

...”

Tamanna tunuliaqutaralugu peqqussutissatut missingiummi § 351-imi aalajangersakkamik ilanngussisoqarpoq, peqqussummi aamma ukiumoortumik naatsorsuutit pillugit inatsimmi, kunngip peqqussutaatigut Kalaallit Nunaannut atuuttussanngortinneqartuni naalagaaffiup aktianik piginneqatigiiffiutaannut maleruagassat piginneqatigiiffinnit Namminersorlutik Oqartusanit pigineqartut malitsinissaat pillugu maleruagassanik aalajangersaanissamut assigisaanik piginnaatitsisumik, inuiaqatigiit immikkut ittumik soqutigisaasa tamanna pisariaqartippassuk.

5. Peqqussutip Kalaallit Nunaannut atuutsinneqalernera ikaarsaariarnermilu aalajangersakkat il.il.

Peqqussut malillugu nalunaarutit arlaqartut suliarineqartussaapput, atuutsinneqalernissaa ikaarsaariarnermilu aalajangersakkat ilanngullugit.

Taamaalilluni peqqussutip atuutilernissaanut piffissaliussaq kiisalu tamatumunnga atatillugu ikaarsaariarnermut aalajangersakkat nalunaarutikkut aalajangersarneqarnissaat peqqussutissatut missingiummi siunnersuutigineqarpoq. Namminersorlutik Oqartussat soorunami tamatumunnga akuutinneqassapput.

Peqqussutip 1. januar 2017-imi atuutilersinneqarnissaa siunnersuutigissallugu eqqarsaataavoq, ikaarsaariarnermullu aalajangersakkat nalunaarutikkut aalajangersarneqarlutik, kalaallit piginneqatigiiffii maleruagassanit maannamut atuuttunit maleruagassanut nutaanut ikaarsaariarnerminni oqilisaassiffigineqassallutik, taamaasilluni kalaallit piginneqatigiiffii maleruagassanut nutaanut tulluarnissamut naammaginatsumik piffissaqassallutik.

Peqqussutissatulli missingiummi siunnersuutigineqarpoq peqqussutip immikkoortuisa ilai piffissani assigiinngitsuni atuuttussanngortinneqarsinnaassasut. Taamatut iliornikkut peqqussummi immikkoortut arlaqartut kalaallit inatsisaannik allannguutinik malunnaatilinnik kinguneqarnissaat eqqarsaatigineqariissaaq. Taamaasilluni peqqussutip ilaata

atortussangortinnera siunnersuutikkut kingusinnerusukku pisinnaasunngortinneqarpoq,
tamanna naleqquttutut isigineqarpat.